

四庫全書

子部

欽定四庫全書

子部

世說新語卷上之上

詳校官侍講學士_臣平恕

侍讀_臣孫球覆勘

總校官編修_臣王燕緒

校對官學正_臣蔡必昌

謄錄監生_臣周文彬

欽定四庫全書

子部十二

世說新語

小說家類一

雜事之屬

提要

臣等謹案世說新語三卷宋臨川王劉義慶撰梁劉孝標註義慶事迹具宋書孝標名峻以字行事迹具梁書黃伯思東觀餘論謂世說之名肇於劉向其書已亡故義慶所集名世說新書段成式酉陽雜俎引王敦淝豆事

尚作世說新書可証不知何人改為新語蓋
近世所傳然相沿已久不能復正矣所記分
三十八門上起後漢下迄東晉皆軼事瑣語
足為談助唐書藝文志稱劉義慶世說八卷
劉孝標續十卷崇文總目惟載十卷晁公武
讀書志謂當是孝標續義慶元本八卷通成
十卷又謂家有詳畧二本迥不相同今其本
皆不傳惟陳振孫書錄解題作三卷與今本

合其每卷析為上下則世傳陸游所刊本已
然蓋即舊本至振孫載汪藻所云叙錄二卷
首為考異繼列人物世譜姓字異同末記所
引書目者則佚之久矣自明以來世俗所行
凡二本一為王世貞所刊註文多所刪節殊
乖其舊一為袁褧所刊蓋即從陸本翻雕者
雖板已剝敝然猶屬完書義慶所述劉知幾
史通深以為譏然義慶本小說家言而知幾

繩之以史法擬不於倫未為通論孝標所注
特為典瞻高似孫緯畧極推之其糾正義慶
之紕繆尤為精核所引諸書今已佚其十之
九惟賴是註以傳故與裴松之三國志註鄭
道元水經註李善文選註同為考証家所引
據焉乾隆四十六年十月恭校上

總纂官_臣紀昀_臣陸錫熊_臣孫士毅

總校官_臣陸費墀

世說新語原序

嘗攷載記所述晉人話言簡約玄澹爾雅有韻世言江左善清譚今閱新語信乎其言之也臨川撰為此書採掇綜叙明暢不繁孝標所注能收錄諸家小史分釋其義話訓之賞見於高似孫緯畧余家藏宋本是放翁校刊本謝湖躬耕之暇手披心寄自謂可觀爰付梓人傳之同好因嘆昔人論司馬氏之祚亡於清談斯言也無乃過甚矣乎竹林之儔希慕沂樂蘭亭之集咏歌堯風

陶荊州之勤敏謝東山之恬鎮解莊易則輔嗣平叔擅
其宗析梵言則道林法深領其乘或詞冷而趣遠或事
瑣而意奧風旨各殊人有興託王茂弘祖士雅之流才
通氣峻心翼王室又班班載諸冊簡是可非之者哉詩
不云乎濟濟多士文王以寧余以瑯琊王之渡江諸賢
弘贊之力為多非強說也夫諸賢晤言率遇藻裁遂為終
身品目故類以標格相高玄虛成習一時雅尚有東京
厨俊之流風焉然曠達拓落濫觴莫採取譏世教撫卷

惜之此於諸賢不無遺憾焉耳矣刻成序之嘉靖乙未
歲立秋日也吳郡袁褰撰

欽定四庫全書

世說新語卷上之上

宋 劉義慶 撰

梁 劉孝標 注

德行第一

陳仲舉言為士則行為世範登車攬轡有澄清天下之

志

汝南先賢傳曰陳蕃字仲舉汝南平輿人有室荒蕪不掃除曰大丈夫當為國家掃天下值漢桓之末閭

豎用事外戚豪橫及拜太傅與大將軍竇武謀誅宦官反為所害

為豫章太守

海內先賢傳曰

蕃為尚書以忠正忤貴戚不得在臺還豫章太守

至便問徐孺子所在欲先看

之謝承後漢書曰徐穉字孺子豫章南昌人清妙高跼超世絕俗前後為諸公所辟雖不就及其死萬里赴

弔常預災鷄一隻以綿漬酒中暴乾以裹雞徑到所赴冢隧外以水漬綿斗米飯白茅為藉以雞置前酌酒畢

留謁即去不見喪主主簿白羣情欲府君先入解陳曰武王式商

容之間席不暇煖許叔重曰商容殷之賢人老子師也車上跽曰式吾之禮賢

有何不可袁宏漢紀曰蕃在豫章為穉獨設一榻去則懸之見禮如此

周子居常云吾時月不見黃叔度則鄙吝之心已復生

矣子居別見典略曰黃憲字叔度汝南慎陽人時論者咸云顏子復生而族出孤鄙父為牛醫潁川荀季和

執憲手曰足下吾師範也後見袁奉高曰卿國有顏子寧知之乎奉高曰卿見吾叔度耶戴良少所服下見憲

則自降薄帳然若有所失母問汝何不樂乎復從牛醫兒所來邪良曰瞻之在前忽焉在後所謂良之師也

郭林宗至汝南造袁奉高

續漢書曰郭泰字林宗太原介休人泰少孤年二十行學

至城阜屈伯彥精廬乏食衣不蓋形而處約味道不改其樂李元禮一見稱之曰吾見士多矣無如林宗者也及卒蔡伯喈為作碑曰吾為人作銘未嘗不有慚容唯為郭有道碑頌無愧耳初以有道君子徵泰曰吾觀乾象人事天之所廢不可支也遂辭以疾汝南先賢傳曰袁宏字奉高慎陽人友黃叔度於童齒薦陳仲舉於家巷辟太尉掾卒車不停軌鸞不輟輶詣黃叔度乃彌日信宿人

問其故林宗曰叔度汪汪如萬頃之波澄之不清擾之

不濁其器深廣難測量也

泰別傳曰薛恭祖問之泰曰泰別傳曰薛恭祖問之泰曰奉高之器譬諸汎濫雖清易

也

李元禮風格秀整高自標持欲以天下名教是非為已

任

薛瑩後漢書曰李膺字元禮潁川襄城人抗志清妙有文武雋才遷司隸校尉為黨事自殺

後進

之士有升其堂者皆以為登龍門

三秦記曰龍門一名河津去長安九百里

水懸絕龜魚之屬莫能上上則化為龍矣

李元禮嘗歎荀淑鍾皓

先賢行狀曰荀淑字季和潁川潁陰人也所拔韋褐郭收之中

執案刀筆之吏皆為英彥舉方正補朗陵侯相所在流化鍾皓字李明潁川長社人父袒至德著名皓高風承世除林慮長不之官人位不足天爵有餘曰荀君清識難尚鍾君至德可師

海內先賢傳曰：潁川先輩為海內所師者，定陵陳揮叔、潁陰荀淑、長社鍾皓、少府李膺。宗此三君，常言荀君清識難尚。陳鍾至德可師。

陳太丘詣荀朗陵，貧儉無僕役。

陳寔傳曰：寔字仲弓，潁川許昌人，為聞喜令。太

丘長風化宣流。

乃使元方將車。

先賢行狀曰：陳紀字元方，寔長子也。至德絕俗，與寔高名並著。

而弟諶又配之，每宰府辟召，羔鴈成羣，世號三君百城，皆圖畫。

季方持杖後從，長丈尚

小，載箸車中。既至，荀使叔慈應門，慈明行酒，餘六龍下

食。

張璠漢紀曰：淑有八子，儉鯢、靖、蕪、汪、爽、肅、敷、淑。居西豪里縣，令范康曰：昔高陽氏有才子八人，遂署其里。

為高陽里時人號曰八龍。

文若亦小坐，箸膝前。于時太史奏真人東

行檀道鸞續晉陽秋曰陳仲弓從諸子姪造荀

父子于時德星聚太史奏五百里賢人聚

客有問陳季方

海內先賢傳曰陳謚字季方寔少子也才識博達司空掾公車徵不就足

下家君太丘有何功德而荷天下重名季方曰吾家君

譬如桂樹生泰山之阿上有萬仞之高下有不測之深

上為甘露所需下為淵泉所潤當斯之時桂樹焉知泰

山之高淵泉之深不知有功德與無也

陳元方子長文有英才

魏書曰陳羣字長文祖寔嘗謂宗人曰此兒必興吾宗及長有

識度其所善皆父黨

與季方子孝先

陳氏譜曰謚子忠字孝先州辟不就

各論其父

功德爭之不能決咨於太丘太丘曰元方難為兄季方

難為弟

一作元方難為弟季方難為兄

荀巨伯遠看友人疾

荀氏家傳曰巨伯漢桓帝時人也亦出潁川未詳其始末

值胡

賊攻郡友人語巨伯曰吾今死矣子可去巨伯曰遠來

相視子令吾去敗義以求生豈荀巨伯所行耶賊既至

謂巨伯曰大軍至一郡盡空汝何男子而敢獨止巨伯

曰友人有疾不忍委之寧以我身代友人命賊相謂曰

我輩無義之人而入有義之國遂班軍而還一郡並獲

全

華歆遇子弟甚整雖閒室之內嚴若朝典

魏志曰歆字子魚平原高

唐人魏略曰靈帝時與北海郗原管寧俱遊學相善時號三人為一龍謂歆為龍頭原為龍腹寧為龍尾陳

元方兄弟恣柔愛之道而二門之裏兩不失雍熙之軌

馬管寧華歆共園中鋤菜

傳子曰寧字幼安北海朱虛人齊相管仲之後也見

地有片金管揮鋤與瓦石不異華捉而擲去之又嘗同

席讀書有乘軒冕過門者寧讀如故歆廢書出看寧割

席分坐曰子非吾友也

魏略曰寧少恬靜常笑郗原華子魚有仕宦意及歆為司徒上

書讓寧寧聞之笑曰子魚
本欲作老吏故榮之耳

王朗每以識度推華歆

魏書曰朗字景興東海郟人魏司徒歆蜡日禮記曰天

子大蜡八伊耆氏始為蜡蜡索也歲十二月合聚萬物而索饗之五經要義曰三代名臘夏曰嘉平殷曰清祀周曰大蜡總謂之臘晉博士張亮議曰蜡者合聚百物索饗之歲終休老息民也臘者祭宗廟五祀傳曰臘接也祭則新故交接也秦漢已來臘之明日為祝歲古之遺語也嘗集子姪燕飲王亦學

之有人向張華說此事張曰王之學華皆是形骸之外

去之所以更遠

王隱晉書曰張華字茂先范陽人也累遷司空而為趙王倫所害

華歆王朗俱乘船避難有一人欲依附歆輒難之朗曰

幸尚寬何為不可後賊追至王欲舍所攜人歆曰本所以疑正為此耳既已納其自託寧可以急相棄邪遂攜

拯如初世以此定華王之優劣

華矯譜叙曰歆為下邦令漢室方亂乃與同志

士鄭太等六七人避世自武關出道遇一丈夫獨行願得與俱皆哀許之歆獨曰不可今在危險中禍福患害義猶一也今無故受之不知其義若有進退可中棄乎衆不忍卒與俱行此丈夫中道墮井皆欲棄之歆乃曰已與俱矣棄之不義卒共還出之而後別

王祥事後母朱夫人甚謹

晉諸公贊曰祥字休徵琅邪臨沂人祥世家曰祥父融娶

高平薛氏生祥繼室以廬江朱氏生覽晉陽秋曰後母數譖祥屢以非理使祥弟覽輒與祥俱又虐使祥婦覽

妻亦趨而共之。母患方盛，寒水凍，母欲生魚。祥解衣將剖水求之。會有處水小解，魚出。蕭廣濟孝子傳曰：祥後母忽欲黃雀炙，祥念難卒致，須臾有數十黃雀飛入其幕。母之所須，必自奔走，無不得焉。其誠至如此。家

有一李樹，結子殊好。母恒使守之。時風雨忽至，祥抱樹

而泣。

蕭廣濟孝子傳曰：祥後母庭中有李，始結子，使祥晝視。鳥雀夜則趨鼠，一夜風雨大至，祥抱泣至曉。

母見之，惻然。祥嘗在別牀眠，母自往闇斫之。值祥私起，空斫

得被，既還，知母憾之不已，因跪前請死。母於是感悟，愛

之如己子。

虞預晉書曰：祥以後母故，陵遲不仕。年向六十，刺史呂虔撥為別駕。時人歌之曰：海沂之

康實賴王祥，邦國不空。別駕之功，累遷太僕。

晉文王稱阮嗣宗至慎每與之言言皆玄遠未嘗臧否

人物

魏書曰文王諱昭字子上宣帝第二子也魏氏春秋曰阮籍字嗣宗陳留尉氏人阮瑀子也宏達不

羈不拘禮俗交州刺史王昶請與相見終日不得與言昶愧歎之自以不能測也口不踰事自然高邁李康家諷曰昔嘗侍坐於先帝時有三長史俱見臨辭出上曰為官長當清當慎當勤修此三者何患不治乎並受詔上顧謂吾等曰必不得已而去於斯三者何先或對曰清固為本復問吾對曰清慎之道相須而成必不得已慎乃為大上曰卿言得之矣可舉近世能慎者誰乎吾乃舉故太尉荀景倩尚書董仲達僕射王公仲上曰此諸人者溫恭朝夕執事有恪亦各其慎也然天下之至慎者其唯阮嗣宗乎每與之言言及玄遠而未嘗評論時事臧否人物可謂至慎乎

王戎云與嵇康居二十年未嘗見其喜愠之色

康集叙曰康字

叔夜誰國銍人王隱晉書曰嵇本姓奚其先避怨徙上虞移誰國銍縣以出自會稽取國一支音同本奚焉虞預晉書曰銍有嵇山家於其側因氏焉康別傳曰康性含垢藏瑕愛惡不爭於懷喜怒不寄於顏所知王濬冲在襄城面數百未嘗見其疾聲朱顏此亦方中之美範人倫之勝業也文章叙錄曰康以魏長樂亭主簿遷郎中拜中散大夫

王戎和嶠同時遭大喪俱以孝稱王雞骨支牀和哭泣

備禮

晉諸公贊曰戎字濬冲琅邪人太保祥宗族也文皇帝輔政鍾會薦之曰裴楷清通王戎簡要即俱

辟為掾晉踐阼累遷荊州刺史以平吳功封安豐侯晉陽秋曰戎為豫州刺史遭母憂性至孝不拘禮制飲酒

食肉或觀棋奕而容貌毀悴杖而後起時汝南和嶠亦名士也以禮法自持處大憂量米而食然顓顓哀毀不逮我武帝謂劉仲雄曰王隱晉書曰劉毅字仲雄東萊掖人漢城陽景王後也亮直清

方見有不善必評論之王公大人望風憚之僑居陽平太守杜恕致為功曹沙汰郡吏三百餘人三魏僉曰但聞劉功曹不聞杜府君累遷尚書司隸校尉卿數省王和不聞和哀苦過禮

使人憂之仲雄曰和嶠雖備禮神氣不損王戎雖不備禮而哀毀骨立臣以和嶠生孝王戎死孝陛下不應憂

嶠而應憂戎

晉陽秋曰世祖及毅談以此貴戎也

梁王趙王

朱鳳晉書曰宣帝張夫人生趙王倫字子嬰位至徽位至太宰桓夫人生趙王倫字子嬰位至

相國之近屬貴重當時裴令公晉諸公贊曰裴楷字叔則河東聞喜人司空秀

之從弟也父徽冀州刺史有俊識楷特精易義累遷河南尹中書令卒歲請二國租錢數

百萬以恤中表之貧者或譏之曰何以乞物行惠裴曰

損有餘補不足天之道也名士傳曰楷行已取與任心而動毀譽雖至處之晏然皆

類此

王戎云太保居在正始中不在能言之流及與之言理

中清遠將無以德掩其言晉陽秋曰祥少有美德行

王安豐遭艱至性過人裴令往弔之曰若使一慟果能

傷人濬沖必不免滅性之譏

曲禮曰居喪之禮毀瘠不形視聽不哀不勝喪乃比

於不慈不孝孝經曰毀不滅性聖人之教也

王戎父渾有令名官至涼州刺史

世語曰渾字長原有才望歷尚書涼州刺

史渾薨所歷九郡故吏懷其德惠相率致賻數百萬戎

悉不受

虞預晉書曰戎由是顯名

劉道真嘗為徒

晉百官名曰劉寶字道真高平人徒罪役作者

扶風王駿

虞預

曰駿字子臧宣帝第十七子好學至孝晉諸公贊曰駿八歲為散騎常侍侍魏齊王講晉受禪封扶風王鎮關

中為政最美薨贈武王西士思之但見其碑贊者皆拜之而泣其遺愛如此

以五百疋布贖

之既而用為從事中郎當時以為美事

王平子胡母彥國諸人皆以任放為達或有裸體者

晉諸

公贊曰王澄字平子有達識荊州刺史永嘉流人名曰胡母輔之字彥國泰山奉高人湘州刺史王隱晉書曰魏末阮籍嗜酒荒放露頭散髮裸袒箕踞其後貴游子弟阮瞻王澄謝鯤胡母輔之之徒皆祖述於籍謂得大道之本故去巾幘脫衣服露醜惡同禽獸甚者名之為通次者名之為達也樂廣笑曰名教

中自有樂地何為乃爾也

郗公值永嘉喪亂在鄉里甚窮餒鄉人以公名德傳共飴之公常攜兄子邁及外生周翼二小兒往食鄉人曰

各自饑困以君之賢欲共濟君耳恐不能兼有所存公於是獨往食輒含飯著兩頰邊還吐與二兒後並得存

同過江

郝鑒別傳曰鑒字道徽高平金鄉人漢御史大夫郝憲後也少有體正軌思經籍以儒雅著名

永嘉末天下大亂饑饉相望冠帶以下皆割已之資供鑒元皇徵為領軍遷司空太尉中興書曰鑒兄子邁字

思遠有幹世才畧累遷少府中護軍

郝公亡翼為剡縣解職歸席苦於公

靈牀頭心喪終三年

周氏譜曰翼字子卿陳郡人祖奕上谷太守父優車騎咨議歷剡令

青州刺史少府卿六十四而卒

顧榮在洛陽嘗應人請覺行炙人有欲炙之色因輟已

施焉同坐嗤之榮曰豈有終日執之而不知其味者乎

後遭亂渡江每經危急常有一人左右已問其所以乃

受炙人也

文士傳曰榮字彥先吳郡人其先越王勾踐之支庶封於顧邑子孫遂氏焉世為吳著姓

大父雍吳丞相父穆宜都太守榮少朗俊機警風穎標徽歷廷尉正曾在省與同僚共飲見行炙者有異於常僕乃割炙以噉之後趙王倫篡位其子為中領軍逼用榮為長史及倫誅榮亦被執凡受戮等輩十有餘人或救榮者問其故曰榮省中受炙臣也榮乃悟而嘆曰一餐之惠恩今不忘古人豈虛言哉

祖光祿少孤貧性至孝常自為母炊爨作食

王隱晉書曰祖納字

士言范陽道人九世孝廉納諸母三兄最治行操能清言歷太子中庶子廷尉卿避地江南溫嶠薦為光祿大

夫王平北聞其佳名以兩婢餉之因取為中郎

王又別傳曰又

字叔元琅邪臨沂人時蜀新平二將作亂文帝西之長安乃徵為相國司馬遷大尚書出督幽州諸軍事平北將有人戲之者曰奴價倍婢祖云百里奚亦何必輕於

五穀之皮邪

楚國先賢傳曰伯里奚字井伯楚國人少仕於虞為大夫晉欲假道於虞以伐虢諫

而不聽奚乃去之說苑曰秦穆公使賈人載鹽於虞諸賈人買百里奚以五羊皮穆公觀鹽怪其牛肥問其故對曰飲食以時使之不暴是以肥也公令有司沐浴衣冠之公孫支讓其卿位號曰五穀大夫

周鎮罷臨川郡還都未及上住泊青溪渚

永嘉流人名曰鎮字康時

陳留尉氏人也祖父和故安令父震司空長史中興書曰鎮清約寡欲所在有異績王丞相往看

之

丞相別傳曰王導字茂弘琅邪人祖覽以德行稱父裁侍御史導少知名家世貧約恬暢樂道未嘗以風

塵

懷也

時夏月暴雨卒至舫至狹小而又大漏殆無復坐

處王曰胡威之清何以過此即啟用為吳興郡

晉陽秋曰胡威

字伯虎淮南人父質以忠清顯質為荊州威自京師往省之及告歸質賜威絹一匹威跪曰大人清高於何得此質曰是吾奉祿之餘故以為汝糧耳威受而去每至客舍自放驢取樵爨食畢復隨侶進道質帳下都督陰齋糧要之因與為伴每事相助經營之又進少飯威疑之密誘問之乃知都督也謝而遣之後以白質質杖都督一百除其吏名父子清慎如此及威為徐州世祖賜見與論邊事及平生帝歎其父清因謂威曰卿清孰與父對曰臣清不如也帝曰何以為勝汝邪對曰臣父清畏人知臣清畏人不知是以不如遠矣

鄧攸始避難於道中棄已子全弟子

晉陽秋曰攸字伯道平陽襄陵人七

歲喪父母及祖父母持重九年性清慎平簡鄧粲晉紀曰永嘉中攸為石勒所獲召見立幕下與語悅之坐而飯馬攸車所止與胡人鄰穀胡人失火燒車營勒吏案問胡胡誣攸攸度不可與爭乃曰向為老姥作粥失火延逸罪應萬死勒知遣之所誣胡厚德攸遺其驢馬護送令得逸王隱晉書曰攸以路遠所壞車以牛馬負妻子以叛賊又掠其牛馬攸語妻曰吾弟早亡唯有遺民今當步走擔兩兒盡死不如棄已兒抱遺民吾後猶當有兒婦從之中興書曰攸棄兒於草中兒啼呼追之至莫復及攸明日繫兒於樹而去遂渡江至尚書左僕射庾亮子綏服既過江取一妾甚寵愛歷年後詢其所由攸齊衰三年

妾具說是北人遭亂憶父母姓名乃攸之甥也攸素有

德業言行無玷聞之哀恨終身遂不復畜妾

王長豫為人謹順事親盡色養之孝

中興書曰王悅字長豫丞相導長子

也仕至中書侍郎

丞相見長豫輒喜見敬豫輒嗔

文字志曰王恬字敬豫導

次子也少卓犖不羈疾學尚武不為導所重至中軍將軍多才藝善隸書與濟陽江彪以善奕聞

長豫

與丞相語恒以慎密為端丞相還臺及行未嘗不送至

車後恒與曹夫人併當箱篋長豫亡後丞相還臺登車

後哭至臺門曹夫人作麤封而不忍開

王氏譜曰導娶彭城曹韶女名

淑

桓常侍聞人道深公者輒曰此公既有宿名加先達知

稱又與先人至交不宜說之

桓彝別傳曰彝字茂倫譙國龍亢人漢五更桓榮十

世孫也父頴有高名彝少孤識鑒明朗避亂渡江累遷
散騎常侍僧法深不知其俗姓蓋衣冠之胄也道徽高
扇譽播山東為中州劉公弟子值永嘉亂投迹揚土居
止京邑內持法綱外允具瞻弘道之法師也以業慈清
淨而不耐風塵考室刺縣東二百里岬山中同遊十餘
人高棲浩然支道林宗其風範與高麗道人書稱其德
行年七十有九
終於山中也

庾公乘馬有的盧

晉陽秋曰庾亮字元規潁川鄆陵人明穆皇后長兄也淵雅有德量時人

方之夏侯太初陳長文之倫侍從父瑒避地會稽端拱
巍然郡人嚴憚之覲接之者數人而已累遷征西大將

軍荊州刺史伯樂相馬經曰馬白額入口至齒者或語名曰榆鴈一名的盧奴乘客死主乘棄市凶馬也

令賣去

語林曰殷浩勸公賣馬

庾云賣之必有買者即復害其主

寧可不安已而移於他人哉昔孫叔敖殺兩頭蛇以為

後人古之美談

賈誼新書曰孫叔敖殺而埋之歸見其母泣問其故

對曰夫見兩頭蛇者必死今出見之故爾母曰蛇今安在對曰恐後人見殺而埋之矣母曰夫有陰德必有陽報爾無憂也後遂興於楚朝及長為楚令尹

效之不亦達乎

阮光祿在剡曾有好車借者無不皆給有人葬母意欲借而不敢言阮後聞之嘆曰吾有車而使人不敢借何

以車為遂焚之

阮光祿別傳曰裕字思曠陳留尉氏人祖畧齊國內史父顗汝南太守裕淹通

有理識累遷侍中以疾築室會稽剡山徵金紫光祿大夫不就年六十一卒

謝奕作剡令

中興書曰謝奕字無奕陳郡陽夏人祖衡太子少傅父哀吏部尚書奕少有器鑒辟

太尉掾剡令累遷豫州刺史

有一老翁犯法謝以醇酒罰之乃至過

醉而猶未已太傅時年七八歲著青布袴在兄膝邊坐

諫曰阿兄老翁可念何可作此奕於是改容曰阿奴欲

放去邪遂遣之

謝太傅絕重褚公常稱褚季野雖不言而四時之氣亦

備

文字志曰謝安字安石奕弟也世有學行安弘粹通遠溫雅融暢桓彝見其四歲時稱之曰此兒風神秀

徹當繼蹤王東海善行書累遷太保錄尚書事贈太傅晉陽秋曰褚裒字季野河南陽翟人祖碧安東將軍父治武昌太守裒少有簡貴之風沖默之稱累遷江充二州刺史贈侍中太傅

劉尹在郡臨終綿惓聞閣下祀神鼓舞正色曰莫得淫

祀

劉尹別傳曰惓字真長沛國蕭人也漢氏之後真長有雅裁雖華門陋巷晏如也歷司徒左長史侍中丹

陽尹為政務鎮靜信誠風塵不能移也

外請殺車中牛祭神真長荅曰丘

之禱久矣勿復為煩

包氏論語曰禱請也孔安國曰孔子素行合於神明故曰丘之禱久

矣

謝公夫人教兒問太傅那得初不見君教兒荅曰我常

自教兒

謝氏譜曰安娶沛國劉耽女按太尉劉子真清潔有志操行已以禮而二子不才並瀆貨致罪

子真坐免官客曰子奚不訓導之子真曰吾之行事是其耳目所聞見而不倣效豈嚴訓所變邪安石之旨同子真之意也

晉簡文為撫軍時

續晉陽秋曰帝諱昱字道萬中宗少子也仁明有智度穆帝幼沖以撫軍

輔政大司馬桓溫廢海西公而立帝在位三年而崩

所坐牀上塵不聽拂見鼠行

跡視以為佳有叅軍見鼠白日行以手板批殺之撫軍

意色不悅門下起彈教曰鼠被害尚不能忘懷今復以

鼠損人無乃不可乎

范宣年八歲後園挑菜誤傷指大啼人問痛邪荅曰非

為痛身體髮膚不敢毀傷是以啼耳

宣別傳曰宣字子宣陳留人漢萊蕪

長范丹後也年十歲能誦詩書兒童時手傷改容家人以其年幼皆異之徵太學博士散騎常侍一無所就年

五十卒宣潔行廉約韓豫章遺絹百匹不受

中興書曰宣家至貧罕交

人事豫章太守殷羨見宣茅茨不完欲為改室宣固辭羨愛之以宣貧如年饑疾疫厚餉給之宣又不受續晉

陽秋曰韓伯字康伯潁川人好學善言理歷豫章太守領軍將軍

減五十匹復不受如

是減半遂至一匹既終不受韓後與范同載就車中裂

二丈與范云人寧可使婦無禪邪范笑而受之

王子敬病篤道家上章應首過問子敬由來有何異同

得失子敬云不覺有餘事唯憶與郝家離婚

王氏譜曰獻之娶高

平郝曇女名道茂後離婚獻之別傳曰祖父曠淮南太守父羲之右將軍咸寧中詔尚餘姚公主遷中書令卒

殷仲堪既為荊州值水儉食常五盃盤外無餘肴飯粒

脫落盤席間輒拾以噉之雖欲率物亦緣其性真素每

語子弟云勿以我受任方州云我豁平昔時意今吾處

之不易貧者士之常焉得登枝而捐其本爾曹其存之

晉安帝紀曰仲堪陳郡人太常融孫也車騎將軍謝玄請為長史李武說之俄為黃門侍郎自殺袁悅之後上深為晏駕後計故先出王恭為北蕃荊州刺史王忱死乃中詔用仲堪代焉

初桓南郡楊廣共說殷荊州宜奪殷覲南蠻以自樹

桓玄別傳

曰玄字敬道譙國龍亢人大司馬溫少子也幼重中溫甚愛之臨終命以為嗣年七歲襲封南郡公拜太子洗馬義興太守不得志少時去職歸其國與荊州刺史殷仲堪素舊情好甚隆周祗隆安記曰廣字德度弘農人楊震後也晉安帝紀曰覲字伯道陳郡人由中書郎出為南蠻校尉覲亦以率易才悟著稱與從弟仲堪俱知名中興書曰初仲堪欲起兵密邀覲覲亦即曉其旨不同楊廣與弟佺期勸殺覲仲堪不許

嘗因行散率爾去下舍便不復還內外無預知者意色

蕭然遠同鬪生之無愠時論以此多之

春秋傳曰楚令尹子大鬪氏也

論語曰令尹子文三仕為令尹無喜色三已之無愠色

王僕射在江州為殷桓所逐奔竄豫章存亡未測

徐廣晉紀

曰王愉字茂和太原晉陽人安北將軍坦之次子也以輔國司馬出為江州刺史愉始至鎮而桓玄楊佺期舉兵以應王恭乘流奄至愉無防惶遽奔臨川為玄所得玄篡位遷尚書左僕射王綏在都既憂

憾在貌居處飲食每事有降時人謂為試守孝子

中興書曰

綏字彥猷愉子也少有令譽自王渾至坦之六世戚德綏又知名于時冠冕莫與為比位至中書令荊州刺史桓玄敗後與父愉謀反伏誅

桓南郡

也

既破殷荊州收殷將佐十許人咨議羅企生

亦在焉

玄別傳曰玄克荊州殺殷道護及仲堪
參軍羅企生鮑季禮皆仲堪所親仗也

桓素待

企生厚將有所發先遣人語云若謝我當釋罪企生荅

曰為殷荊州吏今荊州奔亡存亡未判我何顏謝桓公

中興書曰企生字宗伯豫章人殷仲堪初請為府功曹
桓玄來攻轉咨議參軍仲堪多疑少決企生深憂之謂
其弟遵生曰殷侯仁而無斷事必無成成敗天也吾當
死生以之及仲堪走文武並無送者唯企生從焉路經
家門遵生紹之曰作如此分別何可不執手企生回馬
授手遵生便牽下之謂曰家有老母將欲何行企生揮
泣曰今日之事我必死之汝等奉養不失子道一門之
內有忠與孝亦復何恨遵生抱之愈急仲堪於路侍之

企生遙呼曰今日死生是同願少見待仲堪見其無脫
理策焉而去俄而玄至人士悲詣玄企生獨不往而營
理仲堪家或謂曰玄性猜急未能取卿誠節若遂不詣
禍必至矣企生正色曰我殷侯吏見遇以國士不能共
殄醜逆致此奔敗何面目就桓求生乎玄聞怒而收之
謂曰相遇如此何以見負企生曰使君口血未乾而生
此姦計自傷力劣不能剪定凶逆我兄恨晚爾玄遂斬之時年三十有七衆咸悼之既出市桓又

遣人問欲何言荅曰昔晉文王殺嵇康而嵇紹為晉忠

臣

王隱晉書曰紹字延祖譙國鉅人父康有奇才雋辯
紹十歲而孤事母孝謹累遷散騎常侍惠帝敗於蕩

陰百官左右皆奔散唯紹儼然端冕以身
衛帝兵交御輦飛箭雨集遂以見害也

從公乞一弟

以養老母桓亦如言宥之桓先曾以一羔裘與企生母

胡胡時在豫章企生問至即日焚裘

王恭從會稽還

周祇隆安記曰恭字孝伯太原晉陽人祖父濛司徒左長史風流標望父蘊鎮

軍將軍亦得世譽恭別傳曰恭清廉貴峻志存格正起家著作郎歷丹陽尹中書令出為五州都督前將軍青

兖二州刺史

王快看之

王忱小字佛大晉安帝紀曰忱字元達平北將軍坦之第四子也甚得名

於當世與族子恭少相善齊聲見稱仕至荊州刺史

見其坐六尺簾因語恭卿東

來故應有此物可以一領及我恭無言大去後即舉所坐者送之既無餘席便坐薦上後大聞之甚驚曰吾本謂卿多故求耳對曰丈人不悉恭恭作人無長物

吳郡陳遺

未詳

家至孝母好食鐺底焦飯遺作郡主簿恒

裝一囊每煮食輒貯錄焦飯歸以遺母後值孫恩賊出

吳郡

晉安帝紀曰孫恩一名靈秀琅邪人叔父泰事五斗米道以謀反誅恩逸逃於海上聚衆十萬人攻

沒郡縣後為臨海太守辛崑斬首送之

袁府君

山松別見

即日便征遺已聚斂

得數斗焦飯未展歸家遂帶以從軍戰於滬瀆敗軍人潰散逃走山澤皆多饑死遺獨以焦飯得活時人以為純孝之報也

孔僕射為孝武侍中豫蒙眷接烈宗山陵孔時為太

常形素羸瘦著重服竟日涕泗流漣見者以為真孝子

續晉陽秋曰孔安國字安國會稽山陰人車騎愉第六子也少而孤貧能善樹節以儒素見稱歷侍中太常尚

書遷左僕射特進卒

吳道助附子兄弟居在丹陽郡後遭母童夫人艱

道助坦之

小字附子隱之小字也吳氏譜曰坦之字處靖濮陽陽人仕至西中郎將功曹父堅取東苑童儉女名秦姬朝

夕哭臨及思至賓客弔省號踊哀絕路人為之落淚韓

康伯時為丹陽尹母殷在郡每聞二吳之哭輒為悽惻

語康伯曰汝若為選官當好料理此人康伯亦甚相知

韓後果為吏部尚書大吳不免哀制小吳遂大貴達

鄭緝

孝子傳曰隱之字處默少有孝行遭母喪哀毀過禮時與太常韓康伯鄰居康伯母揚州刺史殷浩之妹聰明婦人也隱之每哭康伯母輒輟事流涕悲不自勝終其喪如此謂康伯曰汝後若居銓衡當用此輩人後康伯為吏部尚書乃進用之晉安帝紀曰隱之既有至性加以廉潔奉祿頒九族冬月無被桓玄欲革嶺南之弊以為廣州刺史去州二十里有貪泉世傳飲之者其心無厭隱之乃至水上酌而飲之因賦詩曰石門有貪泉一畝重千金試使夷齊飲終當不易心為虛傳所攻還京師歷尚書領軍將軍晉中興書曰舊云往廣州飲貪泉失廉潔之性吳隱之為刺史自酌貪泉飲之題石門為詩云云

言語第二十一

邊文禮見袁奉高

也

失次序

文士傳曰邊讓字文禮陳留人才雋辯逸大將軍何

進聞其名召署令史以禮見之讓占對閒雅聲氣如流坐客皆慕之讓出就曹時孔融王朗等並前為掾共書刺從讓讓平衡與交接後為奉高曰昔堯聘許由面無

怍色

皇甫謐曰由字武仲陽城槐里人也堯舜皆師而學事焉後隱於沛澤之中堯乃致天下而讓焉由

為人據義履方邪席不坐邪膳不食聞堯讓而去其友巢父聞由為堯所讓以為污已乃臨池洗耳池主怒曰何以污我水由於是遁耕於中嶽潁水之陽箕山之下終身無輕天下色死葬箕山之巔在陽城之南十里堯因就其墓號曰箕山公神以配食五嶽世世奉祀至今不絕也

先生何為顛倒衣裳文

禮荅曰明府初臨堯德未彰是以賤民顛倒衣裳耳

按

闕卒於太尉掾未嘗
為汝南斯說謬矣

徐孺子

也

年九歲嘗月下戲人語之曰若令月中無物

當極明邪

五經通議曰月中有兔蟾蜍者何月陰也蟾蜍亦陰也而與兔並明陰繫於陽也

徐

曰不然譬如人眼中有瞳子無此必不明

孔文舉

融也

年十歲隨父到洛時李元禮有盛名為司隸

校尉詣門者皆僞才清稱及中表親戚乃通文舉至門
謂吏曰我是李府君親既通前坐元禮問曰君與僕有
何親對曰昔先君仲尼與君先人伯陽有師資之尊是

僕與君奕世為通好也元禮及賓客莫不奇之大中大夫陳韙後至人以其語語之韙曰小時了了大未必佳

文舉曰想君小時必當了了韙大踧踖

續漢書曰孔融字文舉魯國人

孔子二十四世孫也高祖父尚鉅鹿太守父宙泰山都尉融別傳曰融四歲與兄食梨輒引小者人問其故荅曰小兒法當取小者年十歲隨父詣京師河南尹李膺有重名融欲觀其為人遂造之膺問高明父祖嘗與僕周旋乎融曰然先君孔子與君先人李老君同德比義而相師友則融與君累世通家也眾坐莫不歎息僉曰異童子也大中大夫陳韙後至同坐以告韙曰人小時了了者長大未必能奇融應聲曰即如所言君之幼時豈實慧乎膺大笑顧謂融曰長大必為偉器

孔文舉有二子大者六歲小者五歲晝日父眠小者牀頭盜酒飲之大兒謂曰何以不拜荅曰偷那得行禮

孔融被收中外惶怖時融兒大者九歲小者八歲二兒故琢釘戲了無遽容融謂使者曰冀罪止於身二兒可得全不兒徐進曰大人豈見覆巢之下復有完卵乎尋

亦收至

魏氏春秋曰融對孫權使有訕謗之言坐棄市二子方八歲九歲融見收夾綦端坐不起左右

曰而父見執二子曰安有巢覆而卵不破者哉遂俱見殺世語曰魏太祖以歲儉禁酒融謂酒以成禮不宜禁由是感衆太祖收寘法焉二子齟齬見收顧謂二子曰何以不辟二子曰父尚如此復何所辟裴松之以為世

語云融兒不辟知必俱死猶差可安孫盛之言誠所未
譬八歲小兒能慙了禍患聰明特達卓然既遠則其憂
樂之情固亦有過成人矣安有見父被執而無變容奕
墓不起若在暇豫者乎昔申生就命言不忘父不以已
之將死而廢念父之情也父安尚猶若茲而況顛沛哉
盛以此為美談無乃賊夫人之子與蓋由好奇情多而
不知言之
傷理也

潁川太守髡陳仲弓

按寔之在鄉里州郡有疑獄不能決者皆將詣寔或到而情首或中

途改辭或託狂悖皆曰寧為刑戮所苦不為陳君所非豈有盛德感人若斯之甚而不自衛反招刑辟殆不然乎此所謂東野之言耳客有問元方府君何如元方曰高明之君

也足下家君何如曰忠臣孝子也客曰易稱二人同心

其利斷金同心之言其臭如蘭

王廣注繫辭曰金至堅矣同心者其利無不入

蘭芳物也無不樂者言其同心者物無不樂也

何有高明之君而刑忠臣孝子

者乎元方曰足下言何其謬也故不相荅客曰足下但

因樞為恭而不能荅元方曰昔高宗放孝子孝已

帝王世紀

曰殷高宗武丁有賢子孝已其母蚤死高宗感後妻之言放之而死天下哀之

尹吉甫放孝子

伯奇

琴操曰尹吉甫周卿也有子伯奇母死更娶後妻生子曰伯邦乃譖伯奇於吉甫於是放伯奇於野

宣王出遊吉甫從伯奇乃作歌以言感之宣王聞之曰此孝子之辭也吉甫乃求伯奇於野而射殺後妻董

仲舒放孝子符起

詳未

唯此三君高明之君唯此三子忠

臣孝子容慙而退

荀慈明與汝南袁閭相見

荀爽一名諱漢南紀曰諱文章典籍無不涉時人諺曰荀

氏八龍慈明無雙潛處篤志徵聘無所就張璠漢紀曰董卓秉政復徵爽爽欲遁去吏持之急起布衣九十五

日而至三公

問潁川人士慈明先及諸兄閭笑曰士但可因

親舊而已乎慈明曰足下相難依據者何經閭曰方問

國士而及諸兄是以尤之耳慈明曰昔者祁奚內舉不

失其子外舉不失其讐以為至公

春秋傳曰祁奚為中軍尉請老晉侯問嗣

焉稱解狐其讐也將立之而卒又問焉對曰午也可其子也君子謂祁奚可謂能舉善矣稱其讐不為諂立其

子不為比公旦文王之詩不論堯舜之德而頌文武者親親

之義也春秋之義內其國而外諸夏且不愛其親而愛

他人者不為悖德乎

禰衡被魏武謫為鼓吏正月半試鼓衡揚枹為漁陽攄

淵淵有金石聲四坐為之改容

典略曰衡字正平原人也文士傳曰衡不

知先所出逸才飄舉少與孔融作爾汝之交時衡未滿二十融已五十敬衡才秀共結殷勤不能相違以建安

初北遊或勸其詣京師貴游者衡懷一刺遂至漫滅竟無所詣融數與武帝賡稱其才帝傾心欲見衡稱疾不

肯往而數有言論帝甚忿之以其才名不殺圖欲辱之乃令錄為鼓吏後至八月相會大閱試鼓節作三重間

列坐賓客以帛絹製衣作一岑牟一單絞及小憚鼓吏
度者皆當脫其故衣著此新衣次傳衡衡擊鼓為漁陽
摻搥蹋地來前躡蹀脚足容態不常鼓聲甚悲音節殊
妙坐客莫不忼慨知必衡也既度不肯易衣吏呵之曰
鼓吏何獨不易服衡便止當武帝前先脫幘次脫餘衣
裸身而立徐徐乃著岑牟次著單絞後乃著幘畢復擊
鼓摻搥而去顏色無忤武帝笑謂四坐曰本欲辱衡
衡反辱孤至今有漁陽摻搥自衡造也為黃祖所殺孔
融曰禰衡罪同胥靡不能發明王之夢

皇甫謐帝王世紀曰武丁夢天

賜已賢人使百工寫其像求諸天下見築者胥靡衣褐
於傳巖之野是謂傳說張晏曰胥靡刑名胥相也靡從
也謂相從也魏武慚而赦之

南郡龐士元聞司馬德操在潁川故二千里候之至遇

德操采桑士元從車中謂曰吾聞丈夫處世當帶金佩

紫焉有屈洪流之量而執絲婦之事

蜀志曰龐統字士元襄陽人少時撲

鈍未有識者潁川司馬徽有知人之鑒士元弱冠往見

徽徽采桑樹上坐士元樹下共語自晝至夜徽異之曰

生當為南州士人之冠冕由是漸顯襄陽記曰士元德

公之從子也年少未有識者唯德公重之年十八使往

見德操與語數曰德公誠知人實盛德也後劉備訪世

事於德操德操曰俗士豈識時務此間自有伏龍鳳雛

謂諸葛孔明與士元也華陽國志曰劉備引士元為

軍帥中郎將從攻洛為流矢所中卒時年三十八

操曰

司馬徽別傳曰徽字德操潁川陽翟人有人倫鑒識居荊州知劉表性暗必害善人乃括囊不談議

時人有以人物問徽者初不辨其高下每輒言佳其婦諫曰人質所疑君宜辨論而一皆言佳豈人所以咨君

之意乎徽曰如君所言亦復佳其婉約遜遁如此嘗有
妄認徽豬者便推與之後得其豬叩頭來還徽又厚辭
謝之劉表子琮往候徽遣問在不會徽自鋤園琮左右
問司馬君在耶徽曰我是也琮左右見其醜陋罵曰死
庸將軍詰郎欲求見司馬君汝何等田奴而自稱是邪
徽歸刈頭著幘出見琮左右見徽故是向老翁恐向琮
道之琮起叩頭辭謝徽乃謂曰卿真不可然吾甚羞之
此自鋤園唯卿知之耳有人臨蠶求簇箔者徽自棄其
蠶而與之或曰凡人損已以贍人者謂彼急我緩也今
彼此正等何為與人徽曰人未嘗求已求之不與將慚
何有以財物令人慚者人謂劉表曰司馬德操奇士也
但未遇耳表後見之曰世間人為妄語此直小書生耳
其智而能愚皆此類荆州破為

子且下車子適知邪徑

之速不慮失道之迷昔伯成耦耕不慕諸侯之榮

莊子曰堯

治天下伯成子高立為諸侯禹為天子伯成辭諸侯而耕於野禹往見之趨就下風而問焉子高曰昔堯治天下不賞而民勸不罰而民畏今子賞罰而民且不仁德自此衰刑自此立夫子盍行邪毋落吾事

原憲

桑樞不易有官之宅

家語曰原憲字子思宋人孔子弟子居魯環堵之室茨以生草蓬戶

不完桑樞而瓦牖上漏下濕坐而弦歌子貢軒車不容巷往見之曰先生何病也憲曰憲聞無財謂之貧學而不能行謂之病今憲貧也非病也夫希世而行比周而友學以為人教以為己仁義之患與馬之飾憲不忍為也何有坐則華屋行則肥馬侍女數十然後為奇此乃

許父

許由巢父

所以忼慨夷齊所以長嘆

孟子曰伯夷叔齊目不視惡色耳不

聽惡聲與鄉人居若

雖有竊秦之爵千駟之富

古史

塗炭蓋聖人之清也

考曰呂不韋為秦子楚行千金貨於華陽夫人請立子楚為嗣及子楚立封不韋洛陽十萬戶號文信侯以詐獲爵故曰竊也論語曰齊景公有馬千駟民無德而稱焉孔安國曰千駟四千匹不足貴也士

元曰僕生出邊垂寡見大義若不一叩洪鐘伐雷鼓則不識其音響也

劉公幹以失敬罹罪

典略曰劉楨字公幹東平寧陽人建安十六年世子為五官中郎將妙

選文學使楨隨侍太子酒酣坐歡乃使夫人甄氏出拜坐上客多伏而楨獨平視他日公聞乃收楨減死輸作部文士傳曰楨性辯捷所問應聲而得坐平視甄夫人配輸作部使磨石武帝至尚方觀作者見楨匡坐正色磨石武帝問曰石何如楨因得喻已自理跪而對曰石出荆山懸巖之巔外有五色之章內含卞氏之珍磨之

不加瑩雕之不增文稟氣堅貞受之自然顧其理
枉屈紆繞而不得中帝顧左右大笑即日赦之
大帝

問曰卿何以不謹於文憲楨答曰臣誠庸短亦由陛下

綱目不疎

魏志曰帝諱丕字子桓受漢禪按諸書或云楨被刑魏武之世建安二十年病亡後七年

文帝乃即位而謂楨得罪黃初之時謬矣

鍾毓鍾會少有令譽

魏書曰毓字季叔潁川長社人相國繇長子也年十四為散騎侍郎

機捷談笑有父風仕至車騎將軍

年十三魏文帝聞之語其父鍾繇

魏志

曰繇字元常家貧好學為周易老子訓歷大理相國遭太傅

曰可令二子來於是救

見毓面有汗帝曰卿面何以汗毓對曰戰戰惶惶汗出

如漿復問會卿何以不汗對曰戰戰慄慄汗不敢出

鍾毓兄弟小時值父晝寢因共偷服藥酒其父時覺且

託寐以觀之毓拜而後飲會飲而不拜

魏志曰會字士季繇少子也敏

惠風咸中護軍蔣濟著論謂觀其眸子足以知人會年五歲繇遣見濟濟甚異之曰非常人也及壯有才數精

練名理累遷黃門侍郎諸葛誕反丈王征之會謀居多時人謂之子房拜鎮西將軍伐蜀蜀平進位司徒自謂

功名蓋世不可復為人下謂所親曰我淮南以來畫無遺策四海共知持此欲安歸乎遂謀反見誅時年四十

既而問毓何以拜毓曰酒以成禮不敢不拜又問會何

以不拜會曰偷本非禮所以不拜

魏明帝為外祖母築館於甄氏

魏末傳曰帝諱叡字元仲文帝太子以其母廢

未立為嗣文帝與俱獵見子母鹿文帝射其母應弦而倒復令帝射其子帝置弓泣曰陛下已殺其母臣不忍復殺其子文帝曰好語動人心遂定為嗣是為明帝魏書曰文昭甄皇后明帝母也父逸上蔡令烈宗即位追封上蔡君嫡孫象襲爵象薨子暢嗣起大第車駕親自臨之

既成自行視謂左右曰

館當以何為名侍中繆襲曰

文章敘錄曰襲字熙伯東海蘭陵人有才學累遷侍

中光祿勳陛下聖思齊於哲王罔極過於曾閔此館之興情

鍾舅氏宜以渭陽為名

秦詩曰渭陽康公念母也康公之母晉欽公之女文公遭驪姬

之難未反而秦姬卒穆公納文公康公時為太子贈送文公于渭之陽念母之不見也我見舅氏如母存焉按

魏書帝於後園為象母起觀名其里曰渭陽然則象母即帝之舅母非外祖母也且渭陽為館名亦非舊史也

何平叔云服五石散非唯治病亦覺神明開朗

魏畧曰何晏字

平叔南陽宛人漢大將軍進孫也或云何苗孫也尚主又好色故黃初時無所事任正始中曹爽用為中書主選舉宿舊者多得濟拔為司馬宣王所誅奏丞相寒食散論曰寒食散之方雖出漢代而用之者寡靡有傳焉魏尚書何晏首獲神效由是大行於世服者相尋也

嵇中散語趙景真

嵇紹趙至叙曰至字景真代郡人漢末其祖流宕客維氏令新之官至年

十二與母共道傍看母曰汝先世非微賤家也汝後能如此不至曰可爾耳歸便求師誦書蚤聞父耕叱牛聲釋書而泣師問之荅曰自傷不能致榮華而使老父不免勤苦年十四入太學觀時先君在學寫石經古文事

訖去遂隨車問先君姓名先君曰年少何以問我至曰
觀君風器非常故問耳先君具告之至年十五陽病數
數狂走五里三里為家追得又灸身體十數處年十六
遂亡命徑至洛陽求索先君不得至鄴市國史仲和是
魏領軍史渙孫也至便依之遂名翼字陽和先君到鄴
至具道太學中事便遂先君歸山陽經年至長七尺三
寸潔白黑髮赤脣明目鬚鬢不多問詳安諦體若不勝
衣先君嘗謂之曰卿頭小而銳瞳子白黑分明視瞻停
諦有白起風至論議清辯有從橫才然亦不以自長也
孟元基辟為遼東從事在郡斷九獄見稱清當自痛棄
親遠游母亡不見吐卿瞳子白黑分明有白起之風尤
血發病服未竟而亡

三將叙曰白起平原君勸趙孝成王受馮亭王曰受之
秦兵必至武安君必將誰能當之者乎對曰涇池之會
臣察武安君小頭而面銳瞳子白黑分明視瞻不轉小
頭而面銳者敢斷決也瞳子白黑分明者見事明也視

瞻不轉者執志強也可與持久難與爭鋒廉頗為人勇
驚而愛士知難而忍恥與之野戰則不如持守足以當
之王從
其計
恨量小狹趙云尺表能審璣衡之度周髀曰夏至北方二

萬六千里冬至南方十三萬五千里日中樹表則無影
矣周髀長八尺夏至日晷尺六寸髀股也晷勾也正南

千里勾尺五寸正北十里
勾尺七寸周髀之書也
寸管能測往復之氣呂氏春秋曰黃

帝使伶倫自大夏之西崑崙之陰取竹之嶰谷生其竅
厚薄均者斷兩節間而吹之以為黃鍾之管制十二筩
以聽鳳凰之鳴雄鳴六雌鳴六以為律呂續漢書律歷
志曰十二律之變至於六十以律候氣候氣之法為室
三重戶閉塗鑿必周密布緹幔以木為案加律其上何
以葭莩灰抑其內為氣所動者其灰散也以此候之何

必在大但問識如何耳

司馬景王東征

魏書曰司馬師字子元相國宣文侯長子也以道德清粹重於朝廷為大將軍

錄尚書事毋丘儉及師自征之薨諡景王

取上黨李喜以為從事中郎因問

喜曰昔先君辟君不就今孤召君何以來喜對曰先公

以禮見待故得以禮進退明公以法見繩喜畏法而至

耳

晉諸公贊曰喜字季和上黨銅鞮人也少有高行研精藝學宣帝為相國辟喜喜固辭疾景帝輔政為從

事中郎累遷光祿大夫特進贈太保

鄧艾口喫語稱艾艾

魏志曰艾字士載棘陽人少為農人養犢年十二隨母至潁川讀故

大丘長碑文曰言為世範行為士則遂名範字士則後宗族有同者故改焉每見高山大澤輒規度指畫軍營

處所時人多笑焉後見司馬宣王三辟為掾累
遷征西將軍伐蜀蜀平進位太尉為衛瓘所害晉文王

戲之曰卿云艾艾定是幾艾對曰鳳兮鳳兮故是一鳳

朱鳳晉紀曰文王諱昭字子上宣帝次子也列仙傳曰
陸通者楚狂接輿也好養性游諸名山嘗遇孔子而歌
曰鳳兮鳳兮何德之衰往者不可諫
來者猶可追後入蜀在峨嵋山中也

嵇中散既被誅向子期舉郡計入洛文王引進問曰聞
君有箕山之志何以在此對曰巢許狷介之士不足多

慕王大咨嗟

向秀別傳曰秀字子期河內人少為同郡
山濤所知又與譙國嵇康東平呂安友善

並有拔俗之韻具進止無不同而造事營生業亦不異
常與嵇康偶鍛於洛邑與呂安灌園於山陽不慮家之

有無外物不足拂其心弱冠著儒道論棄而不錄好事者或存之或云是其族人所作困於不行乃告秀欲假其名秀笑曰可復爾耳後康被誅秀遂失圖乃應歲舉到京師詣大將軍司馬文王文王問曰聞君有箕山之志何能自屈秀曰常謂彼人不達堯意本非所慕也一坐皆說隨次轉至黃門侍郎散騎常侍

晉武帝始登阼探策得一

晉世譜曰世祖諱炎字安字咸熙二年受魏禪

王者

世數繫此多少帝既不說羣臣失色莫能有言者侍中

裴楷進曰臣聞天得一以清地得一以寧侯王得一以

為天下貞帝說羣臣歎服

王弼老子注云一者數之始物之極也各是一物所以為

主也各以其一
致此清寧貞

滿奮畏風在晉武帝坐北窗作琉璃屏實密似疎奮有

難色帝笑之

荀綽冀州記曰奮字武秋高平人魏太尉寵之孫也性清平有識自吏部郎出為冀

州刺史晉諸公贊曰奮體量清雅有曾祖寵之風遷尚書令為荀顗所害

奮荅曰臣猶吳牛

見月而喘

今之水牛唯生江淮間故謂之吳牛也南土多暑而此牛畏熱見月疑是日所以見月則

喘

諸葛靚在吳於朝堂大會

晉諸公贊曰靚字仲思琅邪人司空誕少子也雅正

有才望誕以壽陽叛遣靚入質於吳以靚為右將軍大司馬

孫皓問卿字仲思為何

所思對曰在家思孝事君思忠朋友思信如斯而已

蔡洪

洪集錄曰洪字叔開吳郡人有才辯初仕吳朝太康中本州從事舉秀才王隱晉書曰洪仕至松滋

令赴洛洛中人問曰幕府初開羣公辟命求英奇於仄

陋采賢雋於巖穴君吳楚之士亡國之餘有何異才而

應斯舉蔡荅曰夜光之珠不必出於孟津之河

舊說云隨侯出

行有蛇斬而中斷者侯連而續之蛇遂得生而去後銜明月珠以報其德光明照夜同晝用曰隨珠左思蜀都賦所謂隨侯

鄙其夜光也

盈握之璧不必采於崑崙之山

韓氏曰和氏之璧蓋

出於井里之中大禹生於東夷文王生於西羌

按孟子曰舜生於諸馮東夷人

也文王生於岐周西戎人也則東夷是舜非禹也

聖賢所出何必常處昔武王

伐紂遷頑民於洛邑

尚書曰成周既成遷殷頑民作多士孔安國注曰殷大夫心不則德

義之經故徙於王都邇教誨也

得無諸君是其苗裔乎

按華令思舉秀才入洛與王武

子相酬對皆與此言不異無容二人同有此辭疑世說穿鑿也

諸名士共至洛水戲

竹林七賢論曰王濟諸人嘗至洛水解楔事明日或問濟曰昨游有

何語議

還樂令

廣

問王夷甫曰今日戲樂乎

虞預晉書曰王紉字

夷甫琅邪臨沂人司徒戎從弟父又平北將軍夷甫蚤知名以清虛通理稱仕至太尉為石勒所害

王曰

裴僕射善談名理混混有雅致

晉惠帝起居注曰裴頠字逸民河東聞喜人司

空秀之少子也冀州記曰頠弘濟有清識稽古善言名理履行高整自少知名歷侍中尚書左僕射為趙王倫

所害張茂先論史漢靡靡可聽晉陽秋曰華博覽洽聞無不貫綜世祖嘗問漢事及

建章千門萬戶華畫地成圖應對如流張安世不能過也我與王安豐戎也說延陵子

房亦超超玄著晉諸公贊曰夷甫好尚談稱為時人物所宗

王武子晉諸公贊曰王濟字武子太原晉陽人司徒渾第二子也有偶才能清言起家太中書郎終太僕

孫子荆文士傳曰孫楚字子荆太原中都人也晉陽秋曰楚驃騎將軍資之孫南陽太守宏之子鄉人

王濟豪俊公子為太中正訪問宏為鄉里品狀濟曰此人非鄉評所能名吾自狀之曰天才英特亮拔不

羣仕至焉翊太守各言其土地人物之美王云其地坦而平其

水淡而清其人廉且貞孫云其山巋巍以嵯峨其水渾

漑而揚波其人磊砢而英多

按三秦記語林載蜀人伊籍稱吳土地人物與此語

同

樂令女適大將軍成都王穎

虞預晉書曰樂廣字彥輔南陽人清夷冲曠加有理

識累遷侍中河南尹在朝廷用心虛淡時人重其貞貴代王戎為尚書令八王故事曰司馬穎字叔度世祖第

十九子封成王兄長沙王執權於洛

晉百官名曰司馬都王人將軍

王八王故事曰遂構兵相圖長沙王親近小人遠外君

世祖第十七子

子凡在朝者人懷危懼樂令既允朝望加有婚親羣小

讒於長沙長沙嘗問樂令樂令神色自若徐答曰豈

以五男易一女

晉陽秋曰成都王之起兵長沙王猜廣廣曰寧以一女而易五男又猶疑之遂

以憂

由是釋然無復疑慮

陸機詣王武子

晉陽秋曰機字士衡吳郡人祖遜吳丞相父抗大司馬機與弟雲並有雋才司

空張華見而說之曰平吳之利在獲二雋機別傳曰武博學善屬文非禮不動入晉仕著作郎至平原內史

子前置數斛羊酪指以示陸曰卿江東何以敵此陸云

有千里蓴羹但未下鹽豉耳

中朝有小兒父病行乞藥主人問病曰患瘡也主人曰

尊侯明德君子何以病瘡

俗傳行瘡鬼小多不病巨人故光武嘗謂景丹曰嘗聞壯士不

病瘡大將軍
反病瘡耶

荅曰來病君子所以為瘡耳

崔正熊詣都郡都郡將姓陳問正熊君去崔杼幾世荅

曰民去崔杼如明府之去陳恒

晉百官名曰崔豹字正熊燕國人惠帝時官至

丞太傅

元帝始過江

朱鳳晉書曰帝諱叡字景文祖伯封琅邪王父恭王瑾嗣帝襲爵為琅邪王少而明

惠因亂過江起義遂即皇帝位謚法曰始建國都曰元

謂顧驃騎曰寄人國土心

常懷慙榮跪對曰臣聞王者以天下為家是以耿亳無

定處

帝王世紀曰殷祖乙徙耿為河所毀今河東皮氏耿鄉是也盤庚五遷復南居亳今景亳是也

鼎遷洛邑

春秋傳曰武王克商遷九鼎於洛邑今之偃師是也

願陛下勿以遷都

為念

庾公造周伯仁

庾預晉書曰周顗字伯仁汝南安城人揚州刺史後長子也晉陽秋曰顗有風

流才氣少知名正體巖然儕輩不敢媒也汝南賁秦淵通清操之士嘗歎曰汝頰固多賢士自頃陵遲雅道殆

衰今復見周伯仁伯仁將祛舊風清我邦族矣舉寒素累遷尚書僕射為王敦所害伯仁曰君何

所欣說而忽肥庾曰君復何所憂慘而忽瘦伯仁曰吾

無所憂直是清虛日來滓穢日去耳

過江諸人每至美日輒相邀新亭藉卉飲宴

丹陽記曰新亭吳舊

立先基崩淪隆安中丹陽尹司馬恢之徙創今地

周侯也中坐而歎曰風景不

殊正自有山河之異皆相視流淚唯王丞相導愀然變

色曰當共戮力王室克復神州何至作楚囚相對春秋傳曰

楚伐鄭諸侯救之鄭執鄆公鍾儀獻晉景公觀軍府見而問之曰南冠而縶者為誰有司對曰楚囚也使稅之問其族對曰伶人也能為樂乎曰先父之職敢有二事與之琴操南音范文子曰楚囚君子也樂操土風不忘舊也君盍歸之以合晉楚之成

衛洗馬初欲渡江形神慘頽語左右云見此芒芒不覺

百端交集苟未免有情亦復誰能遣此晉諸公贊曰衛玠字叔寶河東

安邑人祖父璿太尉父恒黃門侍郎玠別傳曰玠穎識
通達天韻標令陳郡謝幼興敬以亞父之禮論者以為
出王眉子平子武子之右世咸謂諸王三子不如衛家
一兒娶樂廣女裴叔道曰妻父有永清之姿婿有璧潤
之望所謂秦晉之匹也為太子洗馬永嘉四年南至江
夏與兄別於梁里澗語曰在三之義人之所重今日忠
臣致身之運可不勉乎行至豫章乃卒

顧司空未知名詣王丞相丞相小極對之疲睡顧思所

以叩會之

顧和別傳曰和字君孝吳郡人祖容吳荊州刺史父相晉臨海太守和總角知名族人顧

榮雅相器愛曰此吾家之驥也必振翼族累遷尚書令

因謂同坐曰昔每聞元公

顧道公協贊中宗保全江表

鄧粲晉紀曰粲與元帝有布衣之好知中國將亂勸

帝渡江求為安東司馬政皆決之體小不安令人喘息
號仲父晉中興之功導實居其首

丞相因覺謂顧曰此子珪璋特達機警有鋒

會稽賀生體識清遠言行以禮

賀循別見

不徒東南之美

爾雅

曰東南之美者有會稽之竹箭焉

實為海內之秀

劉琨雖隔閼寇戎志存本朝

王隱晉書曰琨字越石中山魏昌人祖邁有經國之

才父璠光祿大夫琨少稱雋朗累遷司徒長史尚書右丞迎大駕於長安以有殊勲封廣武侯年三十五出為

并州刺史為段日磾所害

謂溫嶠曰班彪識劉氏之復興馬援知漢

光之可輔

漢書敘傳曰彪字叔皮扶風人客於天水隴西隗囂有窺覷之志彪作王命論以諷之東

觀漢記曰馬援字文淵茂陵人從公孫述隗囂游後見
光武曰天下反覆盜名字者不可勝數今見陛下寥廓
大度同符高祖乃知帝王自有真也帝甚壯之今晉祚雖衰天命未改吾欲立

功於河北使卿延譽於江南子其行乎溫曰嶠雖不敏

才非昔人明公以桓文之姿建匡立之功豈敢辭命

預虞

晉書曰嶠字太真太原祁人少標俊清徹英穎顯名為
司空劉琨左右司馬是時二都傾覆天下大亂琨聞元皇
受命中興忼慨幽朔志存本朝使嶠奉使喟然對曰
嶠雖乏管張之才而明公有桓文之志敢辭不敏以違
高旨以左長史奉使勸
進累遷驃騎大將軍

溫嶠初為劉琨使來過江于時江左營建始爾綱紀未

舉溫新至深，有諸慮。既詣王丞相，陳主上幽越社稷焚滅山陵夷毀之酷，有黍離之痛。溫忠慨深烈，言與泗俱。丞相亦與之對泣，叙情既畢，便深自陳結。丞相亦厚相

酬納，既出，懽然言曰：「江左自有管夷吾，此復何憂？」

史記曰：管

仲夷，吾者，潁上人，相齊桓公。九合諸侯，一匡天下，語林曰：初，溫奉使勸進晉王，大集賓客，見之。溫公始入，姿形甚陋，合坐盡驚。既坐，陳說九服分崩，皇室弛絕。晉王君臣莫不歔歔及言天下不可以無主，聞者莫不踴躍植髮穿冠。王丞相深相付託。溫公既見丞相，便游樂不住，曰：「既見管仲，天下事無復憂。」

王敦兄含為光祿勳

含別傳曰：含字處弘，琅邪臨沂人。累遷徐州刺史。光祿勳與弟敦作

誅逆伏

敦既逆謀屯據南州含委職奔姑孰

郭榮晉紀曰初王導協贊

中興敦有方面之功敦以劉隗為間已舉兵討之故舍南奔武昌朝廷始警備也

王丞相詣闕

謝

中興書曰導從兄敦舉兵討劉隗導率子弟二十餘人旦旦到公車泥首謝罪

司徒丞相揚

州官僚問訊倉卒不知何辭顧司空時為揚州別駕援

翰曰王光祿遠避流言明公蒙塵路次羣下不寧不審

尊體起居何如

郝太尉拜司空語同坐曰平生意不在多值世故紛紜

遂至台鼎朱博翰音實愧於懷

漢書曰朱博字子元杜陵人為丞相臨拜延登

受策有大聲如鐘鳴上問揚雄李尋對曰洪範所謂鼓妖者也人君不聽左右得進則有無形之聲博後坐事自殺故序傳曰博之籥音鼓妖先作易中孚曰上九籥音登于天貞凶王弼注曰籥高飛也飛者音飛而實不從也

高坐道人不作漢語或問此意簡丈曰以簡應對之煩

高坐別傳曰和尚胡名尸黎密西域人傳云國王子以國讓弟遂為沙門永嘉中始到此土止於大市中和尚天姿高朗風韻道邁丞相王公一見竒之以為吾之徒也周僕射領選撫其背而歎曰若選得此賢令人無恨絳而周侯遇害和尚對其靈坐作胡祝數千言音聲高暢既而揮涕收淚其哀樂廢興皆此類性高簡不學晉語諸公與之言皆因傳譯然神領意得頓在言前塔寺記曰尸黎密冢曰高坐在石子岡常行頭陀卒於梅岡

即葬焉晉元帝於冢
邊立寺因名高坐

卷上之上

周僕射雍容好儀形詣王公初下車隱數人王公含笑
看之既坐傲然嘯詠王公曰卿欲希嵇阮邪荅曰何敢

近舍明公遠希嵇阮

鄧粲晉紀曰伯仁儀容弘偉善於
俯仰應荅精神足以蔭映數人深

自持能致人
而未嘗往焉

庾公嘗入佛圖見卧佛

涅槃經云如來背痛於雙樹間
北背而卧故後之圖繪者為此

象曰此子疲於津梁于時以為名言

摯瞻曾作四郡太守大將軍戶曹叅軍復出作內史

摯氏世本曰瞻字景游京兆長安人太常虞兄子也父育涼州刺史瞻少善屬文起家著作郎中朝亂依王敦為戶曹叅軍歷安豐新蔡西陽太守見敦以故壞裘賜老病外部都督瞻諫曰尊表雖故不宜與小史敦曰何為不可瞻時因醉曰若上服皆可用賜貂蟬亦可賜下乎敦曰非喻所引如此不堪二千石瞻曰瞻視去西陽如脫屣耳敦反乃

左遷隨郡內史

年始二十九嘗別王敦敦謂瞻曰卿

年未三十已為萬石亦太蚤瞻曰方於將軍少為太蚤

比之甘羅已為太老

摯氏世本曰瞻高亮有氣節故以此答敦後知敦有異志建興四年

與第五琦據荊州以距敦竟為所害史記曰甘羅秦相茂之孫也年十二而秦相呂不韋欲使張唐相燕唐不肯行甘羅說而行之又請車五乘以使趙還報秦秦封甘羅為上卿賜以甘茂田宅

梁國楊氏子九歲甚聰惠孔君平

王隱晉書曰孔坦字君平會稽山陰人善

春秋有文辯歷太子舍人累遷廷尉卿

詣其父父不在乃呼兒出為設果

果有楊梅孔指以示兒曰此是君家果兒應聲答曰未

聞孔雀是夫子家禽

孔廷尉以表與從弟沈

孔氏譜曰沈字德度會稽山陰人祖父奕全椒令父羣鴻臚卿

沈至琅邪王允學

沈辭不受廷尉曰晏平仲之儉祀其先人豚

肩不掩豆一狐裘數十年

劉向別錄曰晏平仲名嬰東萊夷離人字齊靈公莊公以

節力行重於齊禮記曰晏平仲祀其先人豚肩不掩豆君子以為儉也又曰晏子一狐裘三十年晏子馬知

禮注豚俎實也豆徑尺言併卿復何辭此於是受而服
豚之兩肩不能掩豆喻少也

之
佛圖澄與諸石遊

澄別傳曰道人佛圖澄不知何許人出於燉煌好佛道出家為沙門永嘉

中至洛陽值京師有難潛遁草澤間石勒雄異好殺害
因勒大將軍郭黑略見勒以麻油塗掌占見吉凶數百
里外聽浮圖鈴聲逆知禍福勒甚敬信之虎即位亦師
澄號大和尚自知終日開棺無屍唯袈裟法服在焉

林公曰澄以石虎為海鷗鳥

趙書曰虎字季龍勒從弟也征伐每斬將拳旗勒死

誅勒諸兒襲位莊子曰海上之人好鷗者每旦之海上
從鷗遊鷗之至者數百而不止其父曰吾聞鷗鳥從汝
遊取來玩之明日之
海上鷗舞而不下

謝仁祖年八歲謝豫章

別見

將送客爾時語已神悟自

參上流諸人咸共歎之曰年少一坐之顏回仁祖曰坐

無尼父馬別顏回

晉陽秋曰謝尚字仁祖陳郡人鯢之子也齟齬喪兄哀慟過人及遭父喪

溫嶠唁之尚號叫極哀既而收涕告訴有異常童嶠奇之由是知名仕至鎮西將軍豫州刺史

陶公疾篤都無獻替之言朝士以為恨

陶氏叙曰侃字士衡具先鄴陽

人後徙尋陽侃少有遠槩綱維宇宙之志察孝廉入洛司空張華見而謂曰後來匡主寧民君其人也劉弘鎮

沔南取為長史謂侃曰昔吾為羊太傅參佐見語云君後當居身處今相觀亦復然矣累遷湘廣荆三州刺史

加羽葆鼓吹封長沙郡公大將軍贊拜不名劍履上殿進太尉贈大司馬謚桓公按王隱晉書載侃臨終表曰

臣少長孤寒始願有限過蒙先朝歷世異恩臣年垂八十位極人臣啟手啓足當復何恨但以餘寇未誅山陵未復所以憤慨兼懷唯此而已猶冀犬馬之齒尚可少延欲為陛下北吞石虎西誅李雄勢遂不振良圖永息臨書振腕涕泗橫流伏願遴選代人使必得良才足以奉宣王猷遵成志業則雖死之日猶生之年有表若此非無

獻替

仁祖聞之曰時無豎刁故不貽陶公語言

呂氏春秋曰管

仲病桓公問曰子如不諱誰代子相者豎刁何如

時賢

以為德音

竺法深在簡文坐劉尹問道人何以游朱門荅曰君自

見其朱門貧道如遊蓬戶

高逸沙門傳曰法師居會稽皇帝重其風德遣使迎焉法

師暫出應命司徒會稽王天性虛澹與法師結殷勤之歡師雖升履丹墀出入朱戟泯然曠達不異蓬宇也

或云卞令

別見

孫盛為庾公記室叅軍

中興書曰盛字安國太原中都人博學強識匪著作郎劉陽令

庾亮為荊州以為征西主簿累遷祕書監

從獵將其二兒俱行庾公不知忽

於獵場見齊莊時年七八歲庾謂曰君亦復來邪應聲荅曰所謂無小無大從公于邁

孫齊由齊莊二人小時詣庾公公問齊由何字荅曰字

齊由公曰欲何齊邪曰齊許由

晉百官名曰孫潛字齊由太原人中興書曰潛

臧長子也豫章太守殷仲堪下討王國寶潛
時在郡逼為咨議參軍固辭不就遂以憂卒
齊莊何字

荅曰字齊莊公曰欲何齊曰齊莊周公曰何不慕仲尼

而慕莊周對曰聖人生知故難企慕庾公大喜小兒對

孫放別傳曰放字齊莊監君次子也年八歲太尉庾公
召見之放清秀欲觀試乃授紙筆令書放便自疏名字
公題後問之曰為欲慕莊周邪放書荅曰意欲慕之公
曰何故不慕仲尼而慕莊周放曰仲尼生而知之非希
企所及至於莊周是其次者故慕耳公謂賓
客曰王輔嗣應荅恐不能勝之卒長沙王相

張玄之顧敷是顧和中外孫皆少而聰惠和並知之而

常謂顧勝親重偏至張頗不厭

敷別見續晉陽秋曰張
玄之字祖希吳郡太守

澄之孫也少以學顯歷吏部尚書出為冠軍將軍吳興太守會稽內史謝玄同時之郡論者以為南北之望玄之名亞謝玄時亦稱

南北二玄卒於郡

于時張年九歲顧年七歲和與俱

至寺中見佛般泥洹像弟子有泣者有不泣者和以問

二孫玄謂被親故泣不被親故不泣數曰不然當由忘

情故不泣不能忘情故泣

大智度論曰佛在陰菴羅雙樹間入般涅槃臥北首大地

震動諸三學人僉然不樂郁伊交涕諸無學人但念諸法一切無常

庾法暢造庾太尉握麈尾至佳公曰此至佳那得在法

暢曰廉者不求貪者不與故得在耳

法暢氏族所出未詳法暢著人

物論自叙其美云悟
鏡有神才辭通辯

庾穉恭為荊州

庾翼別傳曰翼字穉恭潁川鄢陵人也少有大度時論以經畧許之兄太尉亮

堯朝議推才乃以翼都督七州進征南將軍荊州刺史

以毛扇上武帝武帝疑是

故物

傳咸羽扇賦序曰昔吳人直截鳥翼而搖之風不減方圓二扇而功無加然中國莫有生意者滅吳

之後翕然貴之無人不按庾擇以白羽扇獻武帝帝嫌其非新反之不聞翼也

侍中劉劭曰

文字志曰劭字彥祖彭城叢亭人祖訥司隸校尉父松成臯令劭博識好學多藝能書草隸初仕領軍叅軍太

傅出東劭謂京洛必危乃單馬奔揚州歷侍中豫章太守栢梁雲構工匠先居其下

管弦繁奏鍾夔先聽其音

鍾鍾期也夔夔樂正

穉恭上扇以好不

以新庾後聞之曰此人宜在帝左右

何驃騎亡後

何充別見

徵褚公入既至石頭王長史劉尹同

詣褚褚曰真長何以處我真長顧王曰此子能言褚因

視王王曰國自有周公

晉陽秋曰充之卒議者謂太后父哀宜秉朝政哀自丹徒入朝

吏部尚書劉遐勸哀曰會稽王令德國之周公也足下宜以大政付之哀長史王胡之亦勸歸藩於是固辭歸

京

桓公北征經金城見前為琅邪時種柳皆已十圍慨然

曰木猶如此人何以堪攀枝執條泣然流淚

桓溫別傳曰溫字元

子謙國龍亢人漢五更桓榮後也父彛有識鑒溫少有豪邁風氣為溫嶠所知累遷琅邪內史進征西大將軍鎮西夏時逆胡未誅餘燼假息溫親勒郡卒建旗致討清蕩伊洛展敬園陵薨謚宣武侯

簡文作撫軍時嘗與桓宣武俱入朝更相讓在前宣武

不得已而先之因曰伯也執爰為王前驅

衛詩也爰長一丈二尺無

刀簡文曰所謂無小無大從公于邁

顧悅與簡文同年而髮蚤白

中興書曰悅字君叔晉陵人初為殷浩揚州別駕浩

卒上疏理浩或諫以浩為太宗所廢必不依許悅固爭之浩果得申暢論稱之後至尚書左丞

簡文曰

卿何以先白對曰蒲柳之姿望秋而落松柏之質經霜

彌茂

顧凱之為父傳曰君以直道陵遲於世八見王王髮無二毛而君已斑白問君年乃曰卿何偏蚤白

君曰松栢之姿經霜猶茂臣蒲柳之質望秋先零受命之異也王稱善久之

桓公入峽絕壁天懸騰波迅急

晉陽秋曰溫以永和二年率所領七千餘人伐

蜀拜表

迺嘆曰既為忠臣不得為孝子如何

漢書曰王陽為益州

刺史行部至印楚九折坂歎曰奉先人遺體奈何數乘此險以病去官後王尊為刺史至其坂問吏曰非王陽所畏之道邪吏曰是叱其馭曰驅之王陽為孝子王尊為忠臣

初熒惑入太微尋廢海西

晉陽秋曰泰和六年閏十月熒惑入太微端門十一月大

司馬桓溫廢帝為海西公晉安帝紀曰桓溫於枋頭奔敗知民望之去也乃屠表真於壽陽既而謂郝超曰足

以雪枋頭之耻乎超曰未厭有識之情也公六十之年敗於大舉不建高世之勲未足以鎮厭民望因說溫以廢立之事時溫風有此

簡文登阼復入太微帝惡之

徐廣

晉紀曰咸安元年十二月熒惑逆行入太微至時郗超

為中書在直

中興書曰超字景興高平人司空惜之子也少而卓犖不羈有曠世之度累遷中書

郎司徒左長史引超入曰天命脩短故非所計政當無復近日

事不超曰大司馬方將外固封疆內鎮社稷必無若此

之慮臣為陛下以百口保之帝因誦庾仲初詩

庾闡從征詩也

曰志士痛朝危忠臣哀主辱聲甚淒厲都受假還東

帝曰致意尊公家國之事遂至於此由是身不能以道

匡衛思患預防愧歎之深言何能喻因泣下流襟

續晉陽秋

曰帝外壓疆臣憂憤不得志在位二年而崩

簡文在暗室中坐召宣武宣武至問上何在簡文曰某

在斯時人以為能

論語曰師冕見及階子曰階也及席子曰席也皆坐子告之曰某在斯某

在斯注歷告坐中人也

簡文入華林園顧謂左右曰會心處不必在遠翳然林

水便自有濠濮間想也

濠濮二水名也莊子曰莊子與惠子游濠梁水上莊子曰儵魚

出游從容是魚樂也惠子曰子非魚安知魚之樂邪莊
子曰子非我安知我之不知魚之樂也莊周釣在濮水
楚王使二大夫造馬曰願以境內累莊子莊子持竿不
顧曰吾聞楚有神龜者死已三千年矣巾筍而藏於廟
此寧曳尾於塗中寧留骨而貴乎二大夫曰寧
曳尾於塗中莊子曰往矣吾亦寧曳尾於塗中覺鳥獸
禽魚自來親人

謝太傅語王右軍曰中年傷於哀樂與親友別輒作數

日惡王曰

文字志曰王羲之字逸少琅邪臨沂人父曠淮南太守羲之少朗拔為叔父廋所賞善草

隸累遷江州刺史右軍將軍會稽內史

年在桑榆自然至此正賴絲竹陶

寫恒恐兒輩覺損欣樂之趣

支道林常養數匹馬或言道人畜馬不韻支曰貧道重

其神駿

高逸沙門傳曰支道字道林河內林慮人或曰陳留人本姓閭氏少而任心獨往風朗高亮家

世奉法嘗於餘杭山沈思道行冷然獨暢年二十五始釋形入道年五十三終於洛陽

劉尹與桓宣武共聽講禮記桓云時有入心處便覺咫尺玄門劉曰此未關至極自是金華殿之語

漢書叙傳曰班伯少

受詩於師丹大將軍王鳳薦伯於成帝宜勸學召見宴暱拜為中常侍時上方向學鄭寬中張禹朝夕入說尚

書論語於金華

殿詔伯受之

羊秉為撫軍叅軍少亡有令譽夏侯孝若為之叙極相

譖悼

羊秉叙曰秉字長達太山平陽人漢南陽太守續曾孫大父魏郡府君即車騎掾元子也府君夫人

鄭氏無子乃養秉齠齠而佳小心敬慎十歲而鄭夫人薨秉思容盡哀俄而公府掾及夫人並卒秉羣從父率禮相承人不間其親雍雍如也仕叅撫軍將軍事將奮千里之足揮冲天之翼惜乎春秋三十有二而卒昔罕虎死子產以為無與為善自夫子之沒有子產之歎矣亡後有子男又不育是何行善而禍繁也豈非司馬生之所感與

羊權為黃門侍郎侍簡文坐帝問曰夏侯湛

別見

作羊秉叙絕可想是卿何物有後不

羊氏譜曰權字道與徐州刺史悅之

子也仕至尚書左丞

權潛然對曰亡伯令問夙彰而無有繼嗣雖名

播天聽然肩絕聖世帝嗟慨久之

王長史與劉真長別後相見

王長史別傳曰濛字仲祖太原晉陽人其先出自周

室經漢魏世為大族祖父佐北軍中候父訥葉令濛神氣清韶年十餘歲放邁不羣弱冠檢尚風流雅正外絕榮競內寡私欲辟司徒掾中書郎以后父贈光祿大夫王謂劉曰卿更長進荅曰

此若天之自高耳

語林曰仲祖語真長曰卿近大進劉曰卿仰看邪王問何意劉曰不爾何

由測天之高也

劉尹云人想王荆產佳此想長松下當有清風耳

荆產王微

小字也王氏譜曰微字幼仁琅邪人祖父又平北將軍父澄荊州刺史微歷尚書郎右軍司馬

王仲祖聞蠻語不解茫然曰若使介葛盧來朝故當

不昧此語

春秋傳曰介葛盧來朝魯聞牛鳴曰是生三犧皆用之矣其音云聞之而信杜預注曰介

東夷國葛盧其君名也

劉真長為丹陽尹許玄度出都就劉宿

續晉陽秋曰許詢字玄度高陽

人魏中領軍允玄孫總角秀惠衆稱神童長而風情簡素司徒掾辟不就蚤卒

牀帷新麗飲食

豐甘許曰若保全此處殊勝東山劉曰卿若知吉凶由

人吾安得不保此

春秋傳曰吉凶無門唯人所召

王逸少在坐曰令巢

許遇稷契當無此言二人並有愧色

王右軍與謝太傅共登冶城

揚州記曰冶城吳時鼓鑄之所吳平猶不廢王茂弘

所治也 謝悠然遠想有高世之志王謂謝曰夏禹勤王手

足胼胝

帝王世紀曰禹治洪水手足胼胝世傳禹病偏枯足不相過今稱禹步是也

文王旰

食日不暇給

尚書曰文王自朝至于日昃不遑暇食

今四郊多壘

禮記曰四郊多

壘卿大夫之辱也

宜人人自效而虛談廢務浮文妨要恐非當

今所宜謝荅曰秦任商鞅二世而亡

戰國策曰衛商鞅諸庶孽子名鞅姓

公孫氏少好刑名學為秦孝公相封於商

豈清言致患邪

謝太傅寒雪日内集與兒女講論文義俄而雪驟公欣

然曰白雪紛紛何所似兄子胡兒曰

胡兒謝朗小字也續晉陽秋曰朗字

長度安次兄據之長子安蚤知之文
義艷發名亞於玄仕至東陽太守
撒鹽空中差可擬

兄女曰未若柳絮因風起公大笑樂即公大兄無奕女

左將軍王凝之妻也

王氏譜曰凝之字叔平右將軍羲之第二子也歷江州刺史左將軍

會稽內史晉安帝紀曰凝之事五斗米道孫恩之攻會稽凝之謂民吏曰不須備防吾已請大道許遣鬼兵相助賊自破矣既不設備遂為恩所害婦人集曰謝夫人名道蘊有文才所著詩賦誄頌傳於世

王中郎令伏玄度習鑿齒

王中郎傳曰坦之字玄度太原晉陽人祖東海太守承清

淡平遠父述貞貴簡正坦之器度淳深孝友天至譽輯朝野標的當時累遷侍中中書令領北中郎將徐充二州刺史中興書曰伏滔字玄度平昌安丘人少有才學舉秀才大司馬桓溫參軍領大著作掌國史游擊將軍

卒習鑿齒字彥威襄陽人少以文稱善尺牘桓溫在荊州辟為從事歷治中別駕遷榮陽太守論青楚

人物

治集載其論畧曰治以春秋時鮑叔管仲隰朋召忽輪扁甯戚麥丘人逢旦父晏嬰消子戰國時公

羊高孟軻鄒衍田單荀卿鄒奭莒大夫田子方檀子魯連淳于髡昉子田光顏默黔子於陵仲子王叔即墨大

夫前漢時伏徵君終軍東郭先生叔孫通萬石君東方朔安期先生後漢時大司徒伏三老江革逢萌禽慶承

幼子徐防薛方鄭康成周孟玉劉祖榮臨孝存侍其元矩孫寶碩劉仲謀劉公山王儀伯郎宗禰正平劉成國

魏時管幼安邴根矩華子魚徐偉長任昭先伏高陽此皆青士有才德者也鑿齒以神農生於黔中邵南詠其

美化春秋稱其多才漢廣之風不同雞鳴之篇子文叔教羞與管晏比德接輿之歌鳳兮漁父之詠滄浪漢陰

丈人之折子貢市南宜僚屠羊說之不為利回魯仲連不及老萊夫妻田光遜於屈原鄧禹卓茂無敵於天下

管幼安不勝龐公龐士元不推華子魚何鄧二尚書獨步於魏朝樂令無對於晉世昔伏羲葬南郡少昊葬長沙舜葬零陵比其人則準的如此論其土則羣聖之所葬考其風則詩人之所歌尋其事則未有赤眉黃巾之賊此何如青州邪滔與臨成以示韓康伯康伯都無言相往反鑿齒無以對也

王曰何故不言韓曰無可無不可

馬融注論語曰唯義所在

劉尹云清風朗月輒思玄度

晉中興士人書曰許詢能清言于時士人皆欽慕仰

之愛

荀中郎在京口

晉陽秋曰荀羨字全則潁川人光祿大夫羨之子也清和有識裁少以主壻為

尉馬都尉是時殷浩參謀百揆引羨為援頗拉義興吳郡起授北中郎將徐州刺史以蕃屏焉中興書曰羨年

二十八出為徐兗二州中興方伯之少未有若羨者也

登北固望海云

南徐州記曰城西北

有別嶺入江三面臨水高數十丈號曰北固

雖未覩三山便自使人有凌雲

意若秦漢之君必當褰裳濡足

史記封禪書曰蓬萊方丈瀛洲此三山世傳在

海中去人不遠嘗有至者言諸仙人不死藥在焉黃金白銀為宮闕草木禽獸盡白望之如雲及至反居水下欲列即風引船而去終莫能至秦始皇登會稽並海上冀遇三神山之奇樂漢武帝既封泰山無風雨變至方士更言蓬萊諸藥可得於是上欣然東至海冀獲蓬萊者

謝公云賢聖去人其間亦適子姪未之許公歎曰若郝

超聞此語必不至河漢

超別傳曰超精於理義沙門支遁林以為一時之俊莊子曰肩

吾問於連叔曰吾聞言於接輿大而無當
往而不反怪怖其言猶河漢而無極也

支公好鶴住剡東岬山

支公書曰山去會稽二百里

有人遺其雙鶴

少時翅長欲飛支意惜之乃鍛其翮鶴軒翥不復能飛
乃反顧翅垂頭視之如有懊喪意林曰既有凌霄之姿
何肯為人作耳目近玩養令翮成置使飛去

謝中郎經曲阿後湖問左右此是何水

中興書曰謝萬字萬石太傅安

弟也才氣高俊蚤知名歷吏部西中郎將豫州刺史散騎常侍

荅曰曲阿湖

太康地記曰曲阿本

名雲陽秦始皇以有王氣鑿北阮山以敗其勢截其直道使其阿曲故曰曲阿也吳還為雲陽今復名曲阿

謝曰故當淵注渟著納而不流

晉武帝每餉山濤恒少謝太傅

也安

以問子弟車騎

也玄荅

曰當由欲者不多而使與者忘少

謝車騎家傳曰玄字幼度鎮西夷第三子

也神理明俊善微言叔父太傅嘗與子姪燕集問武帝任山公以三事任以官人至於賜予不過斤合常有旨

不玄荅有辭致也

謝胡兒語庾道季

道季庾敳小字徐廣晉紀曰敳字道季太尉亮子也風情率悟以文談致

稱於時歷仕至丹陽尹兼中領軍

諸人莫當就卿談可堅城壘庾曰若

文度來我以偏師待之康伯來濟河焚舟

春秋傳曰秦伯伐晉濟河焚舟

杜預曰
示必死

李弘度常歎不被遇

中興書曰李充字弘度江夏鄢人也祖康父矩皆有美名充初辟丞

相掾記室參軍以貧求
刺縣遷大著作中書郎

殷揚州

殷浩別見

知其家貧問君能

屈志百里不李荅曰北門之歎久已上聞

衛詩北門刺仕不得志也

窮猿奔林豈暇擇木遂授刺縣

王司州至吳興印渚中看

王胡之別傳曰胡之字脩齡琅邪臨沂人王廙之子也歷

吳興太守徵侍中丹陽尹秘書監並不就拜使持節都督司州諸軍事西中郎將司州刺史吳興記曰於潛縣東七十里有印渚渚傍有白石山峻壁四十丈印渚蓋衆溪之下流也印渚已上至縣悉石瀨惡道不可行船

印渚已下水道無險故行旅集焉

歎曰非唯使人情開滌亦覺日月清

朗

謝萬作豫州都督新拜當西之都邑相送累日謝疲頗

於是高侍中往

中興書曰高崧字茂琰廣陵人父悝光祿大夫崧少好學善史傳累遷吏部郎

侍中以公累免官

徑就謝坐因問卿今仗節方州當疆理西蕃

何以為政謝粗道其意高便為謝道形勢作數百語謝

遂起坐高去後謝追曰阿鄴故麤有才具

阿鄴崧小字也

謝因

此得終坐

袁彥伯為謝安南司馬

安南謝奉別見

都下諸人送至瀨鄉將

別既自悽惘歎曰江山遼落居然有萬里之勢

續晉陽秋曰袁

宏字彥伯陳郡人魏郎中令煥六世孫也祖猷侍中父勗臨汝令宏起家建威參軍安南司馬記室太傅謝安賞弘機捷辯速自吏部郎出為東陽郡乃祖之於治亭時賢皆集安欲卒迫試之執手將別顧左右取一扇而贈之宏應聲荅曰輒當奉揚仁風慰彼黎庶合坐歎其要捷性直亮故位不顯也在郡卒

孫綽賦遂初築室畎川自言見止足之分

中興書曰綽字興公太原

中都人少以文稱歷太學博士大著作散騎常侍遂初賦叙曰余少慕老莊之道仰其風流久矣卻感於陵賢妻之言悵然悟之乃經始東山建五畝之宅帶長阜倚茂林孰與坐華幕擊鐘鼓者同年而語其樂哉

齋

前種一株松恒自手壅治之高世遠時亦鄰居

世遠高柔字也

別見語孫曰松樹子非不楚楚可憐但永無棟梁用耳孫

曰楓柳雖合抱亦何所施

桓征西治江陵城甚麗

盛弘之荊州記曰荊州城臨漢江臨江王所治王被徵出城北

門而車軸折父老泣曰吾王去不還矣從此不開北門

會賓僚出江津望之云若

能目此城者有賞顧長康時為客在坐目曰遙望層城

丹樓如霞桓即賞以二婢

王子敬語王孝伯曰羊叔子自復佳耳然亦何與人事

晉諸公贊曰羊祜字叔子太山平陽人也世長吏二千石至祜九世以清德稱為兒時遊汶濱有行父止而觀焉太息曰處士大好相善為之未六十當有重功於天下即富貴無相忘遂去莫知所在累遷都督荊州諸軍事自在南夏吳人說服稱曰羊公莫敢名者南州人聞公喪號哭罷市故不如銅雀臺上

妓

魏武遺令曰以吾妾與妓人皆著銅雀臺上施六尺牀總帷月朝十五日輒使向帳作伎

林公見東陽長山曰何其坦迤

會稽土地志曰山靡迤而長縣因山得名

顧長康從會稽還人問山川之美顧云千巖競秀萬壑

爭流草木蒙籠其上若雲興霞蔚

丘淵之文章錄曰顧愷之字長康晉陵人

父悅尚書左丞愷之義熙初為散騎常侍

簡文崩孝武年十餘歲立至暝不臨

宋明帝文章志曰孝武皇帝諱昌明

簡文第三子也初簡文觀識書曰晉氏祚盡昌明及帝誕育東方始明故因生時以為諱而相與忘告簡文問之乃以諱對簡文流涕曰不意我家昌明便出帝聰惠推賢任才年三十五崩左右啓依常應

臨帝曰哀至則哭何常之有

孝武將講孝經謝公兄弟與諸人私庭講習

續晉陽秋曰寧康三

年九月九日帝講孝經僕射謝安侍坐吏部尚書陸納兼侍中中耽讀黃門侍郎謝石吏部表宏兼執經中書郎車肩月陽尹王混摘句車武子難苦問謝

車肩月別見

謂表羊曰不問則

德音有遺多問則重勞二謝

表羊字小字也表氏家傳曰喬字彥升陳郡人父瓌

光祿大夫喬歷尚書郎江夏相從桓溫平蜀封湘西伯益州刺史

表曰必無此嫌車曰

何以知爾袁曰何嘗見明鏡疲於屢照清流憚於惠風

王子敬云從山陰道上行

會稽土地志曰邑在山陰故以名焉

山川自相

映發使人應接不暇若秋冬之際尤難為懷

會稽郡記曰會稽境

持多名山水峯嘯隆峻吐納雲霧松栝楓柏擢幹竦條潭壑鏡徹清流寫注王子敬見之曰山水之美使人應

接不暇

謝太傅問諸子姪子弟亦何預人事而正欲使其佳諸

人莫有言者車騎荅曰

謝玄

譬如芝蘭玉樹欲使其生於

階庭耳

道壹道人好整飾音辭

王珣遊嚴陵瀨詩叙曰道壹姓竺氏名德沙門題目曰道壹文

鋒富瞻孫鯨為之贊曰馳騁遊說言固不虛唯茲壹公鯨然有餘譬若春圃載芬載數條柯猗蔚枝幹扶疎

從都下還東山經吳中已而會雪下未甚寒諸道人問

在道所經壹公曰風霜固所不論乃先集其慘澹郊邑

正自飄瞥林岫便已皓然

張天錫為涼州刺史稱制西隅既為苻堅所禽用為侍

中後於壽陽俱敗至都

張資涼州記曰天錫字純嘏安定烏氏人張耳後也曾祖軌

永嘉中為涼州刺史值京師大亂遂據涼土天錫篡位自立為涼州牧苻堅使將姚萇攻沒涼州天錫歸長安堅以為侍中比部尚書歸義侯從堅至壽陽堅軍敗遂南歸拜散騎常侍西平公中與書曰天錫後以貧拜廬江太守薨為孝武所器每入言論無不竟日頗有嫉已贈侍中

者於坐問張北方何物可貴張曰桑椹甘香鴝鴒革響

詩魯頌曰翩彼飛鴝集于泮林食我桑椹懷我好音

淳酪養性人無嫉心

西河舊事曰河

西牛羊肥酪過精好但寫酪置革上都不解散也

顧長康拜桓宣武墓作詩云山崩溟海竭魚鳥將何依

宋明帝文章志曰愷之為桓溫叅軍甚被親暱

人問之曰卿憑重桓乃爾哭之

狀其可見乎顧曰鼻如廣莫長風眼如懸河決溜

春秋考異

郵曰距不周風四十五日廣莫風至廣莫者精大備也蓋北風也一曰寒風

或曰聲如震雷

破山淚如傾河注海

毛伯成既負其才氣常稱寧為蘭摧玉折不作蕭敷艾

榮

征西寮屬名曰毛玄字伯成潁川人仕至征西行軍參軍

范甯作豫章

中興書曰甯字武子慎陽縣人博學通覽累遷中書郎豫章太守

八日請

佛有板衆僧疑或欲作荅有小沙彌在坐末曰世尊默

然則為許可衆從其義

司馬太傅齋中夜坐

孝文王傳曰王諱道子簡文皇帝第五子也封會稽王領司徒揚州

刺史進太傅為桓
玄所害贈丞相

于時天月明淨都無纖翳太傅歎以

為佳謝景重在坐

續晉陽秋曰謝重字景重陳郡人父朗東陽太守重明秀有才曾終驃騎

長史荅曰意謂乃不如微雲點綴太傅因戲謝曰卿居心

不淨乃復強欲滓穢太清邪

王中郎甚愛張天錫問之曰卿觀過江諸人經緯江左

軌轍有何偉異後來之彥復何如中原張曰研求幽邃

自王何以還因時修制荀樂之風

荀顗荀勗修定法制樂則未聞

王曰

卿知見有餘何故為符堅所制

張資涼州記曰天錫明鑒顧發英聲少著

荅

曰陽消陰息故天步屯蹇否剥成象豈足多譏

謝景重女適王孝伯兒二門公甚相愛美

謝女譜曰重女月鏡適王

恭子

謝為太傅長史被彈王即取作長史帶晉陵郡太

傅已構嫌孝伯不欲使其得謝還取作咨議外示繫維

而實以乖間之及孝伯敗後太傅繞東府城行散

丹陽記曰

東府城西有簡丈為會稽王時第東則孝文王道子府道子領揚州仍住先舍故俗稱東府

僚屬悉

在南門要望候拜時謂謝曰王甯異謀

阿甯王恭小字也

云是

卿為其計謝曾無懼色斂筭對曰樂彥輔有言豈以五男易一女太傅善其對因舉酒勸之曰故自佳故自佳

桓玄義興還後見司馬太傅太傅已醉坐上多客問人

云桓溫來欲作賊如何

晉安帝記曰溫在姑孰諷朝廷求九錫謝安使吏部郎袁宏具

其草以示僕射王彪之彪之作色曰丈夫豈可以此事語人邪安徐問其計彪之曰聞其疾已篤且可緩其事

安從之

故不行桓玄伏不得起謝景重時為長史舉板荅曰故

宣武公黜昏暗登聖明功超伊霍紛紜之議裁之聖鑒太傅曰我知我知即舉酒云桓義興勸卿酒桓出謝過

檀道鸞論之曰道子可謂易
於由言謝重能解紛紜矣

宣武移鎮南州制街衢平直人謂王東亭曰

王司徒傳曰王珣字

元林丞相導之孫領軍合之子也少以清秀稱大司馬
桓溫辟為主簿從討袁真封交趾望海縣東亭侯累遷
尚書左僕射領丞相初營建康無所因承而制置紆曲
選進尚書令

方此為劣

晉陽秋曰蘇峻既誅大事克平之後都邑殘
荒溫嶠議徙都豫章以即豐全朝士及三吳

豪傑謂可遷都會稽王導獨謂不宜遷都建業往之殊
陵古者既有帝王所治之表又孫仲謀劉玄德俱謂是
王者之宅今雖凋殘宜脩勞來旋定之道鎮靜羣情
且百堵皆作何患不克復乎終至康寧導之策也

東

亭曰此丞相乃所以為巧江左地促不如中國若使阡

陌條暢則一覽而盡故紆餘委曲若不可測

桓玄詣殷荊州殷在妾房晝眠左右辭不之通桓後言

及此事殷云初不眠縱有此豈不以賢賢易色也

孔安國注

論語曰言以好色之心好賢人則善

桓玄問羊孚

羊氏譜曰孚字子道泰山人祖楷尚書郎父綏中書郎孚歷太學博士州別駕太尉

參軍年四十六卒何以共重吳聲羊曰當以其妖而浮

謝混問羊孚何以器舉瑚璉

晉安帝紀曰混字叔源陳郡人司空璉少子也文學

砥礪立名累遷中書令尚書左僕射坐黨劉毅伏誅論語子貢問曰賜也何如子曰汝器也曰何器也曰瑚璉

也鄭玄注曰黍稷
器夏曰瑚殷曰琏

羊曰故當以為接神之器

桓玄既篡位後御牀微陷羣臣失色侍中殷仲文進曰

續晉陽秋曰仲文字仲文陳郡人祖融太常父康吳興
太守仲文聞玄平京邑棄郡投馬玄甚說之引為咨議
參軍時王謐見禮而不覲卞範之被親而少禮其寵遇
隆重兼於王卞矣及玄篡位以佐命親貴厚自封崇與
馬器服窮極綺麗後房妓妾數十絲竹不絕音性甚貪
吝多納賄賂家累千金常若不足玄既敗先投義軍累
遷侍中尚書

當由聖德淵重厚地所以不能載時人善

之

桓玄既篡位將改置直館問左右虎賁中郎省應在何

處有人答曰無省當時殊忤旨問何以知無荅曰潘岳

秋興賦叙曰余兼虎賁中郎將寓直散騎之省

岳別見其賦序

曰晉十有四年余年三十二始見二毛以太尉掾兼虎賁中郎將寓直散騎之省高閣連雲陽景罕曜僕野人也猥廁朝列譬猶池魚籠鳥有江湖山藪之思於是染翰操紙慨然而賦于時秋至故以秋興命篇 玄咨

嗟稱善

劉謙之晉紀曰玄欲復虎賁中郎將疑應直與不訪之僚佐咸莫能定參軍劉簡之對曰昔潘

岳秋興賦序云余兼虎賁中郎將寓直于散騎之省以此言之是應直也玄懼然從之此語微異又荅者未知姓名故詳載之

謝靈運好戴曲柄笠

丘淵之新集錄曰靈運陳郡陽夏人祖玄車騎將軍父渙祕書郎靈

運歷祕書監侍中臨川內史以罪伏誅

孔隱士謂曰卿欲希心高遠何不

能遺曲蓋之貌

宋書曰孔淳之字彥深魯國人少以辭榮就約徵聘無所就元嘉初散騎郎徵

不到隱

謝荅曰將不畏影者未能忘懷

莊子云漁父謂孔子曰人有畏

影惡跡而去之走者舉足適數而跡適多走適疾而影不離自以尚避疾走不休絕力而死不知處陰以休影處靜以息跡愚亦甚矣子脩心守真還以物與人則無異矣不脩身而求之人不亦外事者乎

世說新語卷上之上